

欽定舊五代

卷十
十一之七

舊五代史卷十一

宋門下侍郎參知政事監修國史薛居正等撰

梁書第十一

列傳一后如

文惠皇太后王氏開平初追諡太祖性孝愿奉太后未嘗小失色朝夕視膳爲士君子之規範帝嚴察用法無

纖毫假貸太后言之帝頗爲省刑

北夢瑣言云梁祖父誠蚤卒有三子俱幼

母王氏攜養寄于同縣人劉崇家昆弟之中惟溫狡猾無行崇母撫養之崇弟兄嘗加譴杖一日偷崇家釜而竄爲崇追回崇母遮護之以免撲責善逐走鹿往往及而獲之又崇母嘗見其有龍蛇之異他日與仲兄存入黃巢軍作賊伯兄昱與母王氏尙依劉家溫旣辭去不知存亡及溫領鎮于汴盛飾輿馬使人迎母于崇家王

氏惶恐辭避深藏不之信謂人曰朱三落拓無行何處作賊送死焉能自致富貴汴帥非吾子也使者具陳離鄉去里之由歸國立功之事王氏方泣而信是日與崇母竝迎歸汴溫盛禮郊迎人士改觀崇以舊恩位至列卿爲商州刺史王氏以溫貴封晉國太夫人仲兄存于賊中爲矢石所中而卒溫置酒于母歡甚語及家事謂母曰朱五經辛苦業儒不登一命今有子爲節度使無忝前人矣母不擇良久謂溫曰汝致身及此信爲英特然行誼未必如先人朱二與汝同入賊軍身死蠻獍孤男稚女艱食無告汝未有恤孤之心英特卽有諸無取也溫垂涕謝罪卽令召諸兄子皆至汴友寧友倫皆立軍功位至方鎮

元貞皇后張氏乾化中追諡

五代會要云太祖皇后張氏早崩開平二年追封賢

妃至乾化二年十一月二十三日追冊曰元貞皇后又北夢瑣言云梁祖魏國夫人張氏陽山富室女父蕤曾爲宋州刺史溫時聞張有姿色私心傾慕有麗華之歎及溫在同州得張于兵間因以婦禮納之溫以其宿歎深加禮異張賢明有禮溫雖虎狼其心亦所景伏每軍謀國計必先延訪或已出師中途有所不可張氏一介

請旋如期而至其信重如此初收兗鄆得朱瑾妻温告
之曰彼既無依寓于輜車張氏遣人召之瑾妻再拜張
氏答拜泣下謂之曰竟鄆與司空同姓之國昆仲之間
以小故尋戈致吾媿如此設不幸汴州失守妾亦似吾
媿之今日也又泣下乃度爲尼張恒給其費張旣卒繼
寵者非人及僭號後大縱朋淫骨月聚麀帷薄荒穢以
致友珪之禍起于婦人始能以柔婉之德制豺虎之心
如張氏者不亦賢乎 又案五代會要所載內職有梁
太祖昭儀陳氏昭容李
氏歐陽史竝見家人傳

末帝德妃張氏

五代會要云少帝妃張氏乾化五年九
月二十四日冊爲德妃其夕薨 案歐

陽史次妃郭氏傳云晉天福三年詔太社先藏罪人首
級許親屬收葬乃出末帝首遣右衛將軍安崇阮與妃

同葬妃卒洛陽

又案五代史無外戚傳五代會要云

梁太祖長女安陽公主降羅延規開平二年八月追封

長樂公主降趙巖開平元年五月十一日封普寧公主

降昭祚王氏開平元年五月十一日封金華公主開平

二年十月封真寧公主乾化三年十月五日封少帝長
女壽春公主乾化三年四月五日封第二女壽昌公主

貞明元年九月二十三日封今攷通鑑攷異引梁功臣
列傳云羅延規尙安陽公主又尙金華公主是書羅紹
威傳亦載開平四年詔金華公主出家爲
尼是金華公主實歸羅氏五代會要闕載

舊五代史卷十一攷證

梁列傳一后妃傳末帝德妃張氏 案龐元英文昌雜

錄梁均王晉天福中始葬故妃張氏獨存考功員外
商鵬爲誌文曰七月有期不見望陵之妾九疑無色
空餘泣竹之妃今攷五代會要德妃張氏早薨歐陽
史次妃郭氏莊宗入宮度爲尼是晉天福中尙存者
郭妃非德妃與末帝同葬者德妃非郭妃也歐陽史
不明言同葬者爲何妃文昌雜錄誤以尙存者爲故
妃張氏蓋傳聞之失實也

舊五代史卷十一攷證

舊五代史卷十二

宋門下侍郎參知政事監修國史薛居正等撰

梁書第十二

列傳二 宗室

廣王全昱太祖長兄受禪後封乾化元年還睢陽命內
臣拜餞都外王出宿至于偃師仍詔其子衡王友諒侍
從以歸庶人篡位授宋州節度使貞明二年卒

五代會要云全

昱贈尚書令諡德靖

五代史闕文全昱梁祖之兄也

既受禪宮中開宴惟親王得與

因爲博戲全昱酒酣忽

起取骰子擊盆迸散大呼梁祖曰朱三汝礪山一民因

天下饑荒入黃巢作賊天子用汝爲四鎮節度使富貴

足矣何故滅他李家三百年社稷稱王稱朕吾不忍見

血吾族矣安用博爲梁祖不悅而罷臣謹按梁史廣王

全昱傳曰昱橫野常呼帝爲三宮中博戲之事諱之夫
梁祖弒二君弒一皇后名臣被害者不可勝紀及莊宗
卽位盡誅朱氏惟全昱先令終至道初知單州有稱
廣王之後與尼訟田者豈以一言之善獨存其嗣耶

友諒全昱子初封衡王後嗣廣王繼歷藩郡多行不法
坐弟友能反廢囚京師唐師入汴與友能友誨同日遇
害

友能全昱子封惠王後爲宋滑二州留後

案友能後以叛廢詳見末

帝紀又通鑑云龍紀元年夏四月陳州刺史惠王友能
反舉兵趣大梁詔陝州留後霍彥威宣義節度使王彥
章控鶴指揮使張漢傑將兵討之友能至陳留兵敗走
還陳州諸軍圍之秋七月惠王友能降庚子詔赦其死
降封房
陵侯

友誨全昱子封邵王乾化元年以檢校兵部尙書充控

鶴指揮使坐友能反廢後爲唐兵所殺

安王友寧字安仁少習詩禮長喜兵法有倜儻之風太祖鎮汴累署軍職每因出師多命統驍果以從及擒秦宗權太祖令友寧輜送宗權西獻于長安詔加檢校右散騎常侍行右監門衛將軍自是繼立軍功累官至檢校司空兼龔柳二州刺史太祖駐軍岐下遣友寧領所部兵先歸梁苑以備守禦屬青帥王師範構亂以關東諸兵悉在岐隴欲乘虛竊發自齊魯至于華下羅布姦黨皆詐以委輸貢奉爲名陰與淮夷并門結好會有青人詣裴迪言其狀迪以事告友寧不俟命乃率兵萬餘

人東討師範遣其弟將兵圍齊州友寧引兵救之青寇
大敗奪馬四千蹄斬首數千級及昭宗歸長安朝廷議
迎駕功友寧授嶺南西道節度使加特進檢校司徒賜
號迎鑾毅勇功臣時青寇數千越嶮潛伏欲入兗州友
寧知之伏兵于兗南邀之大破賊衆竟無免者自是兗
壁危窘友寧督諸軍進逼營兵首攻博昌縣月餘未能
拔太祖怒遣劉捍督戰友寧乃下俘民衆十餘萬各領
負木石牽牛驢于城南爲土山旣至令人畜木石排而
築之冤枉之聲聞數十里俄而城陷盡屠其邑人清河
爲之不流及進迫寇壘與青人戰于石樓王師小却友

寧旁自峻阜馳騎以赴敵所乘馬蹶而仆遂沒于陣友
寧將戰之前日有大白蛇蟠于帳中友寧心惡之旣而
果遇禍焉

密王友倫幼聰悟喜筆札曉聲律及長好騎射有經度
之智太祖每奇之曰吾家千里駒也年十九爲宣武軍
校景福初充元從騎軍都將尋表爲右武衛將軍漸委
戎事太祖征兗鄆友倫勒所部兵收聚糧穀以濟軍須
幽滄軍至內黃友倫前鋒夜渡河擊賊奪馬千匹擒斬
甚衆因引兵往八議關卒逢晉軍萬餘騎友倫乃分布
兵士多設疑軍因聲鼓誓衆士伍奮躍追斬數十里其

後李罕之請以上黨來歸爲晉軍所圍太祖遣友倫總步騎數萬越嶮救應遂大破晉軍唐朝加檢校司空守滕州刺史天復元年岐隴用兵晉人乘虛侵于北鄙友倫率徒兵三萬徑往礬山晉人望塵奔逸友倫與氏叔琮等躡其轍追至太原摩壘挑戰獲牛馬萬餘二年領所部兵西赴鳳翔前後累接戰三年昭宗歸長安制授友倫寧遠軍節度使檢校司徒賜號迎鑿毅勇功臣及太祖東歸留友倫宿衛京師歲餘因會賓擊鞠墜馬而卒昭宗輟視朝一日詔贈太傅歸葬于礬山縣開平初有司上言曰東漢受命伯升預其始謀西周尚親叔真

荷其封邑故皇兄存凋零霜露綿歷歲時恩莫逮于陟
岡禮方宏于事日皇姪故邕州節度使友寧故容州節
度使友倫頃因締構俱習韜鈴竝以戰功歿于王事永
言帶礪合議封崇于是存追封朗王友寧追封安王友
倫追封密王

邠王友裕字端夫太祖長子也幼善射御從太祖征代
性寬厚頗得士心唐中和中太祖會并帥李克用攻圍
華州賊將黃勣固守甚堅俄有一人登陴大言克用令
北騎連射終不能中命友裕射之應弦而斃大軍喜噪
聲震山谷克用因以良弓百矢遺焉太祖鎮汴表爲宣

武軍牙校及蔡賊殄滅朝廷議功加檢校左僕射尋爲
牙內馬步都指揮使景福元年總大軍伐徐時朱瑾領
兗鄆之衆爲徐戎外援陣于彭門南石佛山下友裕縱
兵擊之斬獲甚衆瑾領殘黨宵遁時都虞候朱友恭羽
書聞于太祖誣友裕按兵不追賊太祖大怒因驛騎傳
符令裨將龐師古代友裕爲帥仍令按劾其事會使人
誤致書于友裕友裕懼遂以數騎遁于山中尋詣廣王
于輝州以訴其冤賴元貞皇后聞而召之令束身歸汴
力爲營救太祖乃捨之令權知許州乾寧二年加檢校
司空尋爲武寧軍節度畱後四年太祖下東平改天平

軍留後加檢校司徒光啓元年再領許州天復初爲奉
國軍節度留後太祖兼鎮河中以及裕爲護國軍節度
留後尋遷華州節度使加檢校太保興德尹天祐元年
七月兼行營都統領步騎數萬經畧邠岐十月友裕有
疾將校乃謀旋師尋卒于梨園歸葬東京開平初追贈
柳王乾化三年又贈太師

博王友文本姓康名勤太祖養以爲子受禪後封爲王

下有
闕文

爲東京留守嗜酒頗怠于爲政友珪弑逆竝殺友

文末帝卽位盡復官爵

友珪小字遙喜母失其姓本亳州營妓也唐光啓中帝

徇地亳州召而侍寢月餘將捨之而去以娠告是時元
貞皇后賢而有寵帝素憚之由是不果攜歸大梁因畱
亳州以別宅貯之及期妓以生男來告帝喜故字之曰

遙喜後迎歸汴受禪後封郢王開平四年十月爲檢校

司徒充左右控鶴都指揮使兼管四蕃將軍乾化元年

充諸軍都虞候二年弒太祖篡位均王以兵討之自殺

追廢爲庶人

五代會要云郢王友珪開平元年五月九日封至乾化二年六月三日篡位僞改鳳

歷元年三月十七日京城軍亂侍衛袁象先率兵入宮友珪自殺少帝卽位追削爲庶人又載周廣順中張昭修實錄奏云梁末帝之上有郢王友珪篡弒居位未有紀錄請依宋書劉劭例書爲元凶友珪案梁實錄今無

福王友璋太祖第五子受禪後封

賀王友雍太祖第六子受禪後封

建王友徽太祖第七子受禪後封

康王友孜太祖第八子末帝卽位後封以反誅

舊五代史卷十二

舊五代史卷十二攷證

梁列傳二宗室友誨傳後爲唐兵所殺 案王禹偁五代史闕文莊宗卽位盡誅朱氏是書與歐陽史俱同惟通鑑云梁主召友誨與其兄友諒友能竝幽于別第及唐師將至梁主疑諸兄弟乘危謀亂并皇弟賀王友雍建王友徽盡殺之未知所據

密王友倫傳因引兵往八議關 案八議原本訛作八識今據通鑑改正

于是存追封朗王友寧追封安王友倫追封密王 案五代會要開平二年追封皇從子友寧爲安王友倫

爲密王四年追封皇兄存爲朗王據是書作一時竝
封未知孰是

柳王友裕傳遂以數騎遁于山中 案數騎通鑑作二
千騎歐陽史與是書同

康王友孜傳 案友孜通鑑及五代會要作友敬惟歐
陽史與是書同

舊五代史卷十三

宋門下侍郎參知政事監修國史薛居正等撰

梁書第十三

列傳三

朱瑄宋州下邑人也父慶里之豪右以攻剽販鹽爲事吏捕之伏法瑄坐父罪以笞免因入王敬武軍爲小校唐中和二年諫議大夫張濬徵兵于青州敬武遣將曹全晟率軍赴之以瑄隸焉以戰功累遷列校賊敗出關全晟以本軍還鎮會鄆帥薛崇卒部將崔君預據城叛全晟攻之殺君預自爲畱後瑄以功授濮州刺史鄆州

馬步軍都將光啓初魏博韓允中攻鄆全勗爲其所害瑄據城自若三軍推爲畱後允中敗朝廷以瑄爲天平軍節度使累加官至檢校太尉同平章事太祖初鎮大梁兵威未振連歲爲秦宗權所圍士不解甲危殆日數四太祖以瑄同宗早兄事之乃遣使求援于瑄光啓末宗權急攻大梁瑄與弟瑾率兗鄆之師來援大破蔡賊解圍而遁太祖感其力厚禮以歸之先是瑄瑾駐于大梁覩太祖軍士驍勇私心愛之及歸厚懸金帛于界上以誘焉諸軍貪其厚利私遁者甚衆太祖移牒以讓之瑄來辭不遜由是始構隙焉及秦宗權敗太祖移軍攻

時溥于徐州時瑄方右溥乃遣使來告太祖曰巢權繼
爲蛇虺毒螫中原與君把臂同盟輔車相依今賊已平
殄人粗聊生吾弟宜念遠圖不可自相魚肉或行人之
失辭疆吏之踰法可以理遣未得便睽和好投鼠忌器
弟幸思之太祖方怒時溥通于孫儒不從其言及龐師
古攻徐州瑄出師來援太祖深銜之徐旣平太祖併兵
以攻鄆自景福元年冬遣朱友裕領軍渡濟至乾寧三
年宿軍齊鄆間大小凡數十戰語在太祖紀中自是野
無人耕屬城悉爲我有瑄乃使人求救于太原李克用
遣其將李承嗣史儼等援之尋爲羅宏信所扼援路旣

絕瑄瑾竟敗乾寧四年正月龐師古攻陷鄆州遁至中都北匿于民家爲其所箠并妻榮氏擒之來獻俱斬于汴橋下

朱瑾瑄從父弟雄武絕倫性頗殘忍光啓中瑾與兗州節度使齊克讓婚瑾自鄆盛飾車服私藏兵甲以赴禮會親迎之夜甲士竊發擄克讓自稱畱後及蔡賊鴟張瑾與太祖連衡同討宗權前後屢捷以功正授兗州節度使旣得士心有兼并天下之意太祖亦忌之瑾以厚利招誘太祖軍士以爲間諜及太祖攻鄆瑾出師來援累與太祖接戰乾寧二年春太祖令大將朱友恭攻瑾

掘塹柵以環之朱瑄遣將賀瓌及蕃將何懷寶赴援爲
友恭所擒十一月瑾從兄齊州刺史瓊以州降太祖令
執賀瓌懷寶及瓊以徇于城下語曰卿兄已敗早宜效
順瑾僞遣牙將瑚兒持書幣送降太祖自至延壽門外
與瑾交語瑾謂太祖曰欲令大將送符印願得兄瓊來
押領所貴骨肉盡布腹心也太祖遣瓊與客將劉捍取
符笥瑾單馬立于橋上揮手謂捍曰可令兄來余有密
款卽令瓊往瑾先令騎士董懷進伏于橋下及瓊至懷
進突出擒瓊而入俄而斬瓊首投于城外太祖乃班師
及鄆州陷龐師古乘勝攻兗瑾與李承嗣方出兵求芻

粟于豐沛間瑾之二子及大將康懷英判官辛綰小校
閻寶以城降師古瑾無歸卽與承嗣將麾下士將保沂
州刺史尹處賓拒闕不納乃保海州爲師古所迫遂擁
州民渡淮依楊行密行密表瑾領徐州節度使龐師古
渡淮行密令瑾率師以禦之清口之敗瑾有力焉自是
瑾率淮軍連歲北寇徐宿大爲東南之患及行密卒子
涓繼立以徐温子知訓爲行軍副使寵遇頗深後楊溥
僭號知訓爲樞密使知政事以瑾爲同平章事仍督親
軍時徐温父子恃寵專政慮瑾不附已

陳彭年江南別錄云徐知訓初

學兵法于朱瑾瑾悉心教之後與瑾有隙
夜遣壯士殺瑾瑾手刃數人理于舍後

貞明四年六

月出瑾爲淮寧軍節度使知訓設家宴以餞瑾瑾事之
愈遜翼日詣知訓第謝畱門久之知訓家僮私謂瑾曰
政事相公此夕在白牡丹妓院侍者無得往瑾謂典謁
曰吾不奈朝飢且歸旣而知訓聞之愕然曰晚當過瑾
瑾厚備供帳瑾有所乘名馬冬以錦帳貯之夏以羅幃
護之愛妓桃氏有絕色善歌舞及知訓至奉卮酒爲壽
初以名馬奉知訓喜而言曰相公出鎮與吾暫別離恨
可知願此盡歡瑾卽延知訓于中堂出桃氏酒旣醉瑾
斬知訓首示其部下

馬令南唐書云知訓因求馬于瑾瑾不與遂有隙俄出瑾爲靜淮節

度使瑾詣知訓別且願獻前馬知訓喜往謁瑾
家瑾妻出拜知訓答拜瑾以笏擊路遂斬知訓因以其

衆急趨衙城知訓之黨已闔門矣惟瑾得獨入與衙兵戰復踰城而出傷足求馬不獲遂自刎暴其尸于市盛夏無蠅蛆徐温令投之于江部人竊收葬之温疾亟夢瑾被髮引滿將射之温乃爲之禮葬立祠以祭之

馬合南唐

書云初宿衛將李球馬謙挾楊隆演登樓取庫兵以誅知訓陣于門橋知訓與戰頻却朱瑾適自外來以一騎前視其陣曰不足爲也因反顧一麾外兵爭進遂斬球謙亂兵皆潰瑾嘗有德于知訓者也及其凶終吳人皆謂曲在知訓五代史補朱瑾之奔淮南也時行密方圖霸其爲禮待有加于諸將數等瑾感行密見知欲立奇功爲報但憾無入陣馬忽忽不樂一日晝寢夢老叟眉髮皓然謂瑾曰君長憾無入陣馬今馬生矣及廢隸報適退槽馬生一駒見臥未能起瑾驚曰何應之速也行往視之見骨目皆非常馬大喜曰事辦矣其後破杜洪取鍾傳未嘗不得力焉初瑾之來也徐温觀其英烈深忌之故瑾不敢預政及行密死子溥嗣位温與張鎰

爭權襲殺鎬自是事無大小皆決于溫既而溫復爲自
安之計乃以子知訓自代然後引兵出居金陵實欲控
制中外知訓尤恣橫瑾居常嫉之一旦知訓欲得瑾所
乘馬瑾怒遂擊殺知訓提其首請溥起兵誅溫溥素怯
懦見之掩面而走瑾曰老婢兒不足爲計亦自殺中外
大駭且懼溫至遽以瑾尸暴之市中時盛暑肌肉屢日
不壞至青蠅無敢輒泊人有病者或
于暴尸處取土煎而服之無不愈

時溥徐州人初爲州之驍將唐中和初秦宗權據蔡州
侵寇隣藩節度使支詳命溥率師以討之徐軍屢捷軍

情歸順以節鉞授之

舊唐書列傳云時溥彭城人徐之
牙將黃巢據長安詔徵天下兵進

討中和二年武寧軍節度使支詳遣溥與副將陳璠率
師五千赴難行至河陰軍亂剽河陰縣迴溥招合撫諭
其衆復集懼罪屯于境上詳遣人迎犒悉怒之溥乃移
軍向徐州旣入軍人大呼推溥爲畱後送詳于大彭館
溥大出資裝遣陳璠接詳歸京詳宿七里亭其夜爲璠
所殺舉家屠害溥以璠爲宿州刺史竟以違命殺詳溥

誅瑤又令別將帥軍三千赴難京師天子還宮授之節
鉞及黃巢攻陳州秦宗權據蔡州與賊連結徐蔡相近
溥出師討之軍鋒益盛每戰屢捷黃巢之敗也其將尚
讓以數千人降溥後林言又斬黃巢首歸徐州時溥功
名第一詔授檢校太尉中書令鉅鹿郡王宗權未平仍
投溥徐州行營兵馬都統蔡賊平朱全忠與之爭功遂
相嫌怨淮南亂朝廷以全忠遙領淮南節度以平孫儒
行密之亂汴人應援路出徐方溥阻之全忠怒出師攻
徐自光啓至大順六七年間汴軍四集徐泗三郡民無
耕稼類歲水災人喪十六七溥窘蹙求和于汴全忠曰
移鎮則可朝廷以尚書劉崇望代溥以溥爲太子太師
溥懼出城見害不受代汴將隴師古陳兵于野溥求援
于兗州朱瑾出兵救之值大雪糧盡而還城中守陴者
飢甚加之疾疫汴將王重師牛存節夜乘梯而入溥與
妻子登樓自焚而卒實
景福二年也地入于汴

王師範青州人父敬武初爲平盧牙將唐廣明元年無
棣人洪霸郎合羣盜于齊棣間節度使安師儒遣敬武

討平之及巢賊犯長安諸藩擅易主帥敬武乃逐師儒
自爲畱後王鐸承制授以節鉞後以出師勤王功加大
尉平章事龍紀中敬武卒師範年幼三軍推之爲帥棣
州刺史張蟾叛于師範不受節度朝廷乃以崔安潛爲
平盧帥師範拒命張蟾迎安潛至郡同討師範師範遣
將盧宏將兵攻蟾宏復叛與蟾通謀僞旋軍將襲青州
師範知之遣重賂迎宏謂之曰吾以先人之故爲軍府
所推年方幼少未能幹事如公以先人之故令不乏祀
公之仁也如以爲難與成事乞保首領以守先人墳墓
亦惟命宏以師範年幼必無能爲不爲之備師範伏兵

要路迎而享之豫謂紀綱劉鄩曰翼日盧宏至爾卽斬之酬爾以軍校鄩如其言斬宏于座上及同亂者數人因戒厲士衆大行頒賞與之誓約自率之以攻棣州擒張蟾斬之安潛遁還長安師範雅好儒術少負縱橫之學故安民禁暴各有方略當時藩翰咸稱之及太祖平兗鄆遣朱友恭攻之師範乞盟遂與通好天復元年冬李茂貞劫遷車駕幸鳳翔韓全誨矯詔加罪于太祖令方鎮出師赴難詔至青州師範承詔泣下曰吾輩爲天子藩籬君父有難略無奮力者皆強兵自衛縱賊如此使上失守宗祧危而不持是誰之過吾今日成敗以之

乃發使通楊行密遣將劉鄩襲兗州別將襲齊時太祖
方圍鳳翔師範遣將張居厚部輿夫二百言有獻于太
祖至華州城東華將婁敬思疑其有異剖輿視之乃兵
仗也居厚等因呼殺敬思聚衆攻西城時崔允在華州
遣部下閉關拒之遂遁去是日劉鄩下兗州河南數十
郡同日發太祖怒遣朱友寧率軍討之旣而友寧爲青
軍所敗臨陣被擒傳首于淮南天復三年七月太祖復
令楊師厚進攻屯于臨朐師厚屢敗青軍遂進寨于城

下師範懼乃令副使李嗣業詣師厚乞降

新唐書云師厚圍青州敗

師範兵于臨朐執諸將又獲其弟師克是時師範
衆尚十餘萬諸將請決戰而師範以弟故乃請降
太祖

許之歲餘遣李振權典青州事因令師範舉家徙汴師
範將至編素乘驢請罪于太祖太祖以禮待之尋表爲
河陽節度使會韓建移鎮青州太祖帳餞于郊師範預
焉太祖謂建曰公頃在華陰政事之暇省覽經籍此亦
士君子之大務今之青土政簡務暇可復修華陰之故
事建撝謙而已太祖又曰公讀書必須精意勿錯用心
太祖以師範好儒前以青州叛故以此言譏之及太祖
卽位徵爲金吾上將軍開平初太祖封諸子爲王友寧
妻號訴于太祖曰陛下化家爲國人人皆得封崇妾夫
早預艱難粗立勞效不幸師範反逆亡夫橫尸疆場寃

讎尚在朝廷受陛下恩澤亡夫何罪太祖凄然泣下曰
幾忘此賊卽遣人族師範于洛陽先掘坑千第側乃告
之其弟師誨兄師悅及兒姪二百口咸盡戮焉時使者
宣詔訖師範盛啓宴席令昆仲子弟列座謂使者曰死
者人所不能免況有罪乎然予懼坑尸于下少長失序
有愧于先人行酒之次令少長依次于坑所受戮人士
痛之後唐同光三年三月詔贈太尉

劉知俊字希賢徐州沛縣人也姿貌雄傑倜儻有大志
始事徐帥時溥爲列校溥甚器之後以勇略見忌唐大
順二年冬率所部二千人來降卽署爲軍校知俊披甲

上馬輪劔入敵勇冠諸將太祖命左右義勝兩軍隸之
尋用爲左開道指揮使故當時人謂之劉開道後討秦
宗權及攻徐州皆有功尋補徐州馬步軍都指揮使攻
海州下之遂奏授刺史天復初歷典懷鄭二州從平青
州以功奏授同州節度使天祐三年冬以兵五千破岐
軍六萬于美原自是連克鄜延等五州乃加檢校太傅
平章事開平二年春三月命爲潞州行營招討使知俊
未至潞夾寨已陷晉人引軍方攻澤州聞知俊至乃退
尋改西路招討使六月大破岐軍于幕谷俘斬千計李
茂貞僅以身免三年五月加檢校太尉兼侍中封大彭

郡王時知俊威望益隆太祖雄猜日甚會佑國軍節度

使王重師無罪見誅知俊居不自安乃據同州叛

鑿戒錄云

彭城王劉知俊鎮同州日因築營墻掘得一物重八十餘斤狀若油囊召賓幕將校問之劉源曰此是冤氣所結古來固圉之地或有焉昔王充據洛陽修河南府獄亦獲此物源聞酒能忘憂奠以醇醪或可消釋耳然此物之出亦非吉徵也知俊命具酒饌祝酌復瘞之尋有叛城背主之事

送款于李茂貞又

分兵以襲雍華雍州節度使劉捍被擒送鳳翔害之華

州蔡敬思被傷獲免太祖聞知俊叛遣近臣諭之曰朕

待卿甚厚何相負耶知俊報曰臣非背德但畏死耳王

重師不負陛下而致族滅太祖復遣使謂知俊曰朕不

料卿爲此昨重師得罪蓋劉捍言陰結邠鳳終不爲國

家用我今雖知枉濫悔不可追致卿如斯我心恨恨蓋

劉捍誤予事也捍一死固未塞責知俊不報遂分兵以

守潼關太祖命劉鄩率兵進討攻潼關下之時知俊弟

知浣爲親衛指揮使聞知俊叛自洛奔至潼關爲鄩所

擒害之尋而王師繼至知俊乃舉族奔于鳳翔李茂貞

厚待之僞加檢校太尉兼中書令以土疆不廣無藩鎮

以處之但厚給俸祿而已尋命率兵攻圍靈武且圖牧

圍之地靈武節度使韓遜遣使來告急太祖令康懷英

率師救之師次邠州長城嶺爲知俊邀擊懷英敗歸九國

志云李彥琦劉知俊自靈武出師塗經長城嶺梁師茂率精銳數萬躡其後彥琦與知俊同設方略擊救之茂

貞悅署爲涇州節度使復命率衆攻興元進圍西縣會

蜀軍救至乃退

九國志王宗鑑傳云岐將劉知俊等領大軍分路來攻由階成路奪固鎮糧王

宗侃唐襲等禦之至青泥嶺爲知俊所敗退保西縣會

大雨漢江漲宗鑑自羅村得鄉導緣山而行數百里與

宗播遇于鐵谷合軍出湯頭時知俊自斜谷山南直抵

西縣之圍亦至遂解既而爲茂貞左右石簡頤等間之免其軍政

寓于岐下掩關歷年茂貞猶子繼崇鎮秦州因來寧觀

言知俊途窮至此不宜以讒嫉見疑茂貞乃誅簡頤等

以安其心繼崇又請令知俊挈家居秦州以就豐給茂

貞從之未幾邠州亂茂貞命知俊討之時邠州都校李保衡納款于朝廷末帝遣霍彥威率衆先入于邠知俊

遂圍其城半載不能下會李繼崇以秦州降于蜀知俊妻孥皆遷于成都遂解邠州之圍而歸岐陽以舉家人蜀終慮猜忌因與親信百餘人夜斬關奔蜀王建待之甚至卽授武信軍節度使尋命將兵伐岐不克班師因圍隴州獲其帥桑宏志以歸久之復命爲都統再領軍伐岐時部將皆王建舊人多違節度不成功而還蜀人因而毀之先是王建雖加寵待然亦忌之嘗謂近侍曰吾漸衰耗恆思身後劉知俊非爾輩能駕馭不如早爲之所又嫉其名者于里巷間作謠言云黑牛出圈櫻繩斷知俊色黔而丑生櫻繩者王氏子孫皆以宗承爲名

故以此構之僞蜀天漢元年冬十二月建遣人捕知俊
斬于成都府之炭市及王衍嗣僞位以其子嗣禋尚僞
峨眉長公主拜駙馬都尉後唐同光末隨例遷于洛卒
知俊族子嗣彬幼從知俊征行累遷爲軍校及知俊叛
以不預其謀得不坐貞明末大軍與晉王對壘于德勝
久之嗣彬率數騎奔于晉具言朝廷軍機得失又以家
世讎怨將以報之晉王深信之卽厚給田宅仍賜錦衣
玉帶軍中目爲劉二哥居一年復來奔當時晉人謂是
刺客以晉王恩澤之厚故不竊發龍德三年冬從王彥
章戰于中都軍敗爲晉人所擒晉王見之笑謂嗣彬曰

爾可還予玉帶嗣彬惶恐請死遂誅之

楊崇本不知何許人幼爲李茂貞之假子因冒姓李氏名繼徽唐光化中茂貞表爲邠州節度使天復元年冬太祖自鳳翔移軍北伐駐旆于邠郊命諸軍攻其城崇本懼出城請降太祖復置爲邠州節度使仍令復其本姓名焉及師還遷其族于河中其後太祖因統戎往來由于蒲津以崇本妻素有姿色嬖之于別館其婦素剛烈私懷愧恥遣侍者讓崇本曰丈夫擁旄仗鉞不能庇其伉儷我已爲朱公婦今生無面目對卿期于刀繩而已崇本聞之但灑淚含怒及昭宗自鳳翔回京崇本之

家得歸邠州崇本恥其妻見辱因茲復貳于太祖乃遣使告茂貞曰朱氏兆亂謀危唐祚父爲國家磐石不可坐觀其禍宜于此時畢命興復事苟不濟死爲社稷可也茂貞乃遣使會兵于太原時西川王建亦令大將出師以助之岐蜀連兵以攻雍華關西大震太祖遣柳王友裕帥師禦之會友裕卒于行乃班師天祐三年冬十月崇本復領鳳翔邠涇秦隴之師會延州胡章之衆合五六萬屯于美原列柵十五其勢甚盛太祖命同州節度使劉知俊及康懷英帥師拒之崇本大敗復歸于邠州自是垂翅久之乾化元年冬爲其子彥魯所毒而死

彥魯自稱畱後領其軍事凡五十餘日爲崇本養子李保衡所殺保衡舉其城來降末帝命霍彥威爲邠帥由是邠寧復爲末帝所有

蔣殷不知何許人幼孤隨其母適于河中節度使王重盈之家重盈憐之畜爲己子唐天復初太祖旣平蒲陝殷與從兄珂舉族遷于大梁太祖感王重榮之舊恩凡王氏諸子皆錄用焉殷由是繼歷內職累遷至宣徽院使殷素與庶人友珪善友珪篡立命爲徐州節度使乾化三年秋末帝以福王友璋鎮徐方殷自以爲友珪之黨懼不受代遂堅壁以拒命時華州節度使王瓚殷之

從弟也懼其連坐上章言殷本姓蔣非王氏之子也未
帝乃下詔削奪殷在身官爵仍令却還本姓命牛存節
劉鄩等率軍討之是時殷求救于淮南楊溥遣朱瑾率
衆來援存節等逆擊敗之貞明元年春存節劉鄩攻下
徐州殷舉族自燔而死于火中得其尸梟首以獻之

張萬進雲州人初爲本州小校亡命投幽州劉守光厚
遇之任爲裨將滄州劉守文以弟守光囚父而竊據其
位自領兵問罪尋敗于雞蘇守光遂兼有滄景之地令
其子繼威主畱務繼威年幼未能政事以萬進佐之凡
關軍政一皆委任繼威兇虐類父嘗淫亂于萬進之家

萬進怒而殺之

通鑑云乾化二年九月庚子萬進遣使奉表降于梁辛丑以萬進爲義昌雷後

甲辰改義昌爲順化軍以萬進爲節度使此傳疑有闕文又遣使歸于晉旣而末帝

遣楊師厚劉守奇潛兵掠鎮冀因東攻滄州萬進懼乞降師厚表青州節度使俄遷兗州仍賜名守進萬進性旣輕險專圖反側貞明四年冬據城叛命遣使送款于晉王末帝降制削其官爵仍復其本名遣劉鄩討之晉人不能救五年冬萬進危蹙小將邢師遇潛謀內應開門以納王師遂拔其城萬進族誅

史臣曰夫雲雷構屯龍蛇起陸勢均者交關力敗者先亡故瑄瑾時溥之流皆梁之吞噬斯亦理之常也惟瑾

始以竊發有土終以竊發亡身傳所謂君以此始必以
此終者乎師範屬衰季之運以興復爲謀事雖不成忠
則可尚雖貽族滅之禍亦可以與臧洪遊于地下矣知
俊驍武有餘奔亡不暇六合雖大無所容身夫如是則
豈若義以爲勇者乎崇本而下俱以叛滅又何足以道

哉

舊五代史卷十三

舊五代史卷十三攷證

梁列傳三朱瑄傳敬武遣將曹全晟 案新唐書及通

鑑俱作曹存實舊唐書歐陽史與是書同

部將崔君預據城叛全晟攻之 案舊唐書韓簡傳云

曹全晟爲簡所敗死之鄆將崔君裕收合殘衆保鄆

州朱瑄傳云崔君裕權知州事全晟知其兵寡襲君

裕據韓簡傳則全晟死而君裕保其城據朱瑄傳則

君裕爲全晟所殺二傳自相矛盾是書從朱瑄傳又

君預諸史俱作君裕

光啓初魏博韓允中攻鄆 案新唐書作中和初魏博

韓簡東窺曹鄆攷舊唐書韓允中傳乾符元年十一月卒子簡起復爲節度觀察畱後新唐書本紀亦云是攻鄆者韓簡非允中也通鑑作中和二年韓簡擊鄆州當得其實是書訛作允中與諸史年月人名舛異

朱瑾傳瑾從兄齊州刺史瓊以州降 齊州原本作濟州據通鑑及北夢瑣言改正

瑾之二子 案新唐書作瑾子用貞

刺史尹處賓 案新唐書作尹懷賓

出瑾爲淮寧軍節度使 淮寧原本作懷寧今據九國

志改正

愛妓桃氏 案九國志作妻陶氏

王師範傳棗州刺史張蟾叛于師範 張蟾原本作張

儋今據新唐書改正

劉知俊傳尋用爲左開道指揮使 開道原本作關道

今據歐陽史改正

楊崇本傳乾化元年 案原本作乾化四年今據歐陽

史改正

張萬進傳仍賜名守進 守進原本作方進今據本紀

改正

舊五代史卷十三攷證

舊五代史卷十四

宋門下侍郎參知政事監修國史薛居正等撰

梁書第十四

列傳四

羅紹威

舊唐書云紹威字端已

魏州貴鄉人父宏信本名宗弁初

爲馬牧監事節度使樂彥貞光啓末彥貞子從訓驕盈太橫招聚兵甲欲誅牙軍牙軍怒聚謀攻之從訓出據相州牙軍廢彥貞囚于龍興寺逼令爲僧尋殺之推小校趙文建爲畱後先是宏信自言子所居遇一白鬚翁謂之曰爾當爲土地主如是者再心竊異之旣而文建

不治軍情牙軍聚呼曰孰願爲節度使者宏信卽應曰
白鬚翁早以命我可以君長爾曹唐文德元年四月牙
軍推宏信爲畱後朝廷聞之卽正授節旄乾寧中太祖
急攻兗鄆朱瑄求援于太原時李克用遣大將李存信
率師赴之假道于魏屯于莘縣存信御軍無法稍侵魏
之芻牧宏信不平之太祖因遣使謂宏信曰太原志吞
河朔迴戈之日貴道堪憂宏信懼乃歸款于太祖仍出
師三萬攻李存信敗之未幾李克用領兵攻魏營于觀
音門外屬邑多拔太祖遣葛從周援之戰于洹水擒克
用男落落以獻太祖令送于宏信斬之晉軍乃退是時

太祖方圖克郢慮宏信離貳每歲時賂遺必卑辭厚禮
宏信每有答貺太祖必對魏使北面拜而受之曰六兄
比予有倍年之長兄弟之國安得以常隣遇之故宏信
以爲厚已其後宏信累官至檢校太尉封臨清王光化

元年八月薨于位紹威襲父位爲畱後

舊唐書云紹威自文德初授左

散騎常侍充天雄軍節度副使自龍紀至乾寧十年之中累加官爵

朝廷因而命之尋正

授旄鉞累加檢校太尉兼侍中封長沙郡王昭宗東遷
命諸道修洛邑紹威獨營太廟制加守侍中進封鄴王
初至德中田承嗣盜據相魏澶博衛貝等六州召募軍
中子弟置之部下號曰牙軍皆豐給厚賜不勝驕寵年

代寢遠父子相襲親黨膠固其凶戾者強賈豪奪踰法
犯令長吏不能禁變易主帥有同兒戲自田氏已後垂
二百年主帥廢置出于其手如史憲誠何全韓君雄
樂彥貞皆爲其所立優獎小不如意則舉族被誅紹威
懲其往弊雖以貨賂姑息而心銜之紹威嗣世之明年
正月幽州劉仁恭擁兵十萬謀亂河朔進陷貝州長驅
攻魏紹威求援于太祖太祖遣李思安援之屯于洹水
葛從周自邢洛引軍入魏州燕將劉守文單可及與王
師戰于內黃大敗之乘勝追躡會從周亦出軍掩擊又
敗燕軍斬首二萬餘級三年紹威遣使會軍同攻滄州

以報之自是紹威感太祖援助之恩深加景附紹威見唐祚衰凌羣雄交亂太祖兵強天下知必有禪代之志故傾心附結贊成其事每慮牙軍變易心不自安天祐初州城地無故自陷俄而小校李公佺謀變紹威愈懼乃定計圖牙軍遣使告太祖求爲外援太祖許之遣李思安會魏博軍再攻滄州先是安陽公主薨于魏太祖因之遣長直軍校馬嗣勳選兵千人伏兵仗于巨橐中肩舁以入魏州言助女葬事天祐三年正月五日太祖親率大軍濟河聲言視行營于滄景牙軍頗疑其事是月十六日紹威率奴客數百與嗣勳同攻之時宿于牙

城者千餘人遲明盡誅之凡八千家皆赤其族州城爲之一空翼日太祖自內黃馳至鄴時魏軍二萬方與王師同圍滄州聞城中有變乃擁大將史仁遇保于高唐六州之內皆爲勅敵太祖遣諸將分討之半歲方平自是紹威雖除其偏然尋有自弱之悔不數月復有浮陽之役紹威飛輓饋運自鄴至長蘆五百里疊跡重軌不絕于路又于魏州建元帥府署沿道置亭候供牲牢酒備軍募什器上下數十萬人一無闕者及太祖迴自長蘆復過魏州紹威乘間謂太祖曰邠岐太原終有狂譎之志各以興復唐室爲詞王宜自取神器以絕人望天

與不取古人所非太祖深感之及登極加守太傅兼中書令賜號扶天啓運竭節功臣車駕將入洛奉詔重修五鳳樓朝元殿巨木良匠非當時所有倏架于地泝流西立于舊址之上張設綈繡皆有副焉太祖甚喜以寶帶名馬賜之先是河朔三鎮司管鑰備灑掃皆有闡人紹威曰此類皆宮禁指使豈人臣家所宜畜也因搜獲三十餘輩盡以來獻太祖嘉之開平中加守太師兼中書令邑萬戶紹威嘗以臨淄海岱罷兵歲久儲庾山積惟京師軍民多而食益寡願于太行伐木下安陽淇門斲船三百艘置水運自大河入洛口歲漕百萬石以給

宿衛太祖深然之會紹威邁疾革遣使上章乞骸骨太祖撫案動容顧使者曰亟行語而主爲我強飯如有不可諱當世世貴爾子孫以相報也仍命其子周翰監總軍府及訃至輟朝三日冊贈尚書令紹威在鎮凡十七年年三十四薨紹威形貌魁偉有英傑氣工筆札曉音律性復精悍明敏服膺儒術明達吏理好招延文士聚書萬卷開學館置書樓每歌酒宴會與賓佐賦詩頗有情致

太平廣記引羅紹威傳云當時藩牧之中最獲文章之譽每命幕客作四方書檄小不稱意壞裂抵

棄自孳賤起草下筆成文雖無藻麗之風幕客多所不及江東人羅隱者佐錢鏐軍

幕有詩名于天下紹威遣使賂遺敘南巷之敬隱乃聚

其所爲詩投寄之紹威酷嗜其作因目已之所爲日偷
江東集至今鄴中人士諷詠之紹威嘗有公讌詩云簾
前澹泊雲頭日座上蕭騷雨脚風雖深于詩者亦所歎

服紹威子三人長曰廷規位至司農卿尚太祖女安陽
公主又尚金華公主早卒次曰周翰繼爲魏博節度使

通鑑攷異引梁功臣傳云周翰起復雲麾將軍充
天雄軍節度畱後尋檢校司徒正授魏博節度使亦早

卒季曰周敬歷滑州節度使別有傳開平四年夏詔金

華公主出家爲尼居于宋州元靜寺蓋太祖推恩于羅

氏令終其婦節也

五代史補云羅鄴王紹威俊邁有詞
學尤好戲判常有人向官街中韉驢

置鞍于地值牛車過急行碾破其鞍驢主怒毆駕車者
爲廂司所擒紹威更不按問遂判其狀云鄴城大道甚

寬何故駕車碾鞍領韉驢漢子科決待駕車
漢子喜歡詞雖俳諧理甚切當論者許之

趙犖其先天水人代爲忠武牙將會祖賓祖英奇父叔
文皆歷故職犖幼有奇智齟齬之時與隣里小兒戲于
道左恆分布行列爲部伍戰陣之狀自爲董帥指顧有
節如夙習焉羣兒皆稟而從之無敢亂其行者其父目
而異之曰吾家千里駒也必大吾門矣及赴鄉校誦讀
之性出于同輩弱冠有壯節好功名妙于弓劍氣義勇
果郡守聞之擢爲牙校唐會昌中壺關作亂隨父北征
收天井關未幾從王師征蠻浹月方克惟忠武將士轉
戰溪洞之間斬獲甚衆本道錄其勳陟爲馬步都虞候

乾符中王僊芝起于曹濮大縱其徒侵掠汝鄭犍乃率步騎數千襲之賊黨南奔及黃巢陷長安天子幸蜀中原無主人心騷動于是陳州數百人相率告許州連帥願得犍知軍州事其帥卽以狀聞于是天子下詔以犍守陳州刺史旣視事乃謂將吏曰賊巢之虐徧于四方苟不爲長安市人所誅則必驅殘黨以東下況與忠武久爲仇讎凌我土疆勢必然也乃遣增垣墉濬溝洫實倉廩積薪芻凡四門之外兩舍之內民有資糧者悉令輓入郡中繕甲兵利劔稍弓弩矢石無不畢備又招召勁勇寘之麾下以仲弟昶爲防遏都指揮使以季弟翊

爲親從都知兵馬使長子麓次子霖皆分領銳兵黃巢
在長安果爲王師四面扼束食盡人飢謀東奔之計先
遣驍將孟楷擁徒萬人直入項縣犇引兵擊之賊衆大
潰斬獲略盡庄擒孟楷中和三年朝廷聞其功就加檢
校兵部尙書俄轉右僕射不數月加司空進潁川縣伯
巢黨知孟楷爲陳所擒大驚憤乃悉衆東來先據激水
後與蔡州秦宗權合勢以攻宛邱陳人懼焉犇恐衆心
攜離乃于衆中揚言曰忠武素稱義勇淮陽亦謂勁兵
是宜戮力同心捍禦羣寇建功立節去危就安諸君宜
圖之況吾家食陳祿久矣今賊衆圍逼衆寡不均男子

當于死中求生又何懼也且死于爲國不猶愈于生而爲賊之伍耶汝但觀吾之破賊敢有異議者斬之由是衆心靡不踴躍無何開門與賊接戰每戰皆捷賊衆益怒巢于郡北三四里起八僊營如宮闕之狀又修百司廨署儲蓄山峙蔡人濟以甲冑軍無所闕焉凡圍陳三百日大小數百戰雖兵食將盡然人心益固犇因令間道奉羽書乞師于太祖太祖素多犇之勇果乃許之四年四月太祖引大軍與諸軍會于陳之西北陳人望旗鼓出軍縱火急攻巢寨賊衆大潰重圍遂解獻捷于行在五年八月除犇爲蔡州節度使于時巢黨雖敗宗權

益熾六七年間屠膾中原陷二十餘郡惟陳去蔡百餘里兵少力微日與爭鋒終不能屈文德元年蔡州平朝廷議勳以雙檢校司徒充秦寧軍節度使又改授浙西節度使不離宛邱兼領二鎮龍紀元年三月又以平巢蔡功就加平章事充忠武軍節度使仍以陳州爲理所由是中原塵靜唐帝復歸長安陳許流亡之民襁負歸業雙設法招撫人皆感之雙兄弟三人時稱雍睦一日念仲弟昶同心王事共立軍功乃下令盡以軍州事付于昶遂上表乞骸後數月寢疾卒于陳州官舍年六十六葬于宛邱縣之先域累贈太尉雙雖盡忠唐室保全

陳州然默識太祖雄傑每降心託跡爲子孫之計故因解圍之後以愛子結親又請爲太祖立生祠于陳州朝夕拜謁數年之間悉力委輸凡所徵調無不率先故能保其功名長子麓位至列卿次子霖改名巖尙太祖女長樂公主開平初授衛尉卿駙馬都尉二年九月權知洛州軍州事俄轉天威軍使十二月授右羽林統軍改右衛上將軍充大內皇牆使三年七月出爲宿州團練使旋移州刺史其後累歷近職連典禁軍預誅庶人友珪有功末帝卽位用爲租庸使守戶部尙書巖以勳戚自負貨賂公行天下之賄半入其門又以身尙公主聞

唐朝駙馬都尉杜棕位極將相以服御飲饌自奉務極
華侈巖恥其不及由是豐其飲膳嘉羞法饌動費萬錢
儻斂網商其徒如市權勢熏灼人皆阿附及唐莊宗滅
梁室巖踰垣而逸素與徐州溫韜相善巖往依之既至
韜斬巖首送京師

昶字大東犖仲弟也弱冠習兵機沈默大度神形灑落
臨事有通變之才及兄犖爲陳州刺史以昶爲防禦都
指揮使未幾巢將孟楷擁衆萬餘據項城縣昶與兄犖
領兵擊破之擒楷以歸不數月巢黨悉衆攻陳以報孟
楷之役又蔡寇合從兇醜百萬棲于陳郊陳人大恐一

夕昶因巡警假寐于闔閤恍惚間如有陰助昶異而待之遲明開門決戰人心兵勢勇不可遏若有陰兵前導是日擒賊將數人斬首千餘級羣兇氣沮其後連日交戰無不應機俘斬未嘗小衄以至重圍數月士心如一及賊敗圍解朝廷紀勳昶一門之中疊加爵秩當時方鎮之內言忠勇者言守禦者言功勳者言政事者皆以犖昶爲首焉及犖遙領泰寧軍節度以昶爲本州刺史檢校右僕射俄而犖有疾遂以軍州盡付于昶詔授兵馬留後旋遷忠武軍節度使亦以陳州爲理所時宗權未滅中原方受其毒陳蔡封疆相接昶每選精銳深入

蔡境蔡賊雖衆終不能抗以至宗權敗焉朝廷賞勲加檢校司徒昶以大寇削平之後益留心于政事勸課農桑大布恩惠景福元年秋陳許將吏耆老錄其功詣闕以聞天子嘉之命文臣撰德政碑植于通衢以旌其功俄加同平章事昶自圍解之後恆曰梁王之恩不敢忘也是後太祖每有征伐昶訓練兵甲饋輓供億無有不至乾寧二年寢疾薨于鎮年五十五追贈太尉

翊字有節犇季弟也幼而剛毅器宇深沈旣冠好書籍及壯工騎射尤精三略及犇爲陳州刺史以翊爲親從都知兵馬使時巢黨東出商鄧與蔡賊會衆至百餘萬

掘長壕五百道攻陳陳人大懼翊與二兄堅心誓衆激
勵將校約以死節翊以祖先松楸去郭數里慮爲羣盜
穿發乃夜縱心膂之士遷樞入城府庫舊有巨弩數百
枝機牙皆缺工人咸謂不可用翊卽創意制度自調弦
筈置之雉堞間矢激五百餘步凡中人馬皆洞達胷腋
羣賊畏之不敢逼近自仲秋至于首夏軍食將竭士雖
不飽而堅拒之志不移會太祖率大軍解其圍翊兄弟
投泣感謝其後朝廷議功加檢校右僕射遙領處州刺
史肇薨昶爲忠武軍節度使翊遷爲行軍司馬檢校司
空昶薨翊知忠武軍畱後翊公幹之才播于遠邇至于

符籍虛實財穀耗登備閱其根本民之利病無不洞知庶事簡廉公私俱濟太祖深加慰薦尋加特進檢校司徒充忠武軍節度使陳州土壤卑疎每歲壁壘摧圯工役不暇翊遂營度力用俾以甃周砌四墉自是無霖潦之虞光化二年加檢校太保平章事明年檢校侍中進封天水郡公翊博通前古以陳州本伏羲所都南頓乃光武舊地遂稽攷古制崇飾廟貌爲四民祈福之所又詢鄧艾故址決翟王河以溉稻梁大實倉廩民獲其利翊兄弟節制陳許繼擁旌鉞共二十餘年陳人愛戴風化大行天復元年冬韓建爲忠武軍節度使乃徵翊知

同州匡國軍節度留後時太祖統軍岐下珣輸輓調發
旁午道途俄而昭宗還長安詔徵入覲錫迎鑾功臣之
號珣因堅辭藩鎮遂加檢校太傅右金吾衛上將軍及
扈從東遷歲餘以痼疾免官遂歸淮陽未幾薨于私第
年五十五詔贈侍中陳人爲之罷市子穀仕至左驍衛
大將軍宣徽北院使唐莊宗入汴與從兄巖皆族誅
王珂河中人祖縱鹽州刺史父重榮河東節度使破黃
巢有大功封琅邪郡王珂本重榮兄重簡之子出繼重
榮唐僖宗光啓三年重榮爲部將常行儒所害推重榮
弟重盈爲蒲帥以珂爲行軍司馬及重盈卒軍府推珂

爲留後時重盈子珙爲陝州節度使瑤爲絳州刺史由是爭爲蒲帥瑤珙連上章論列又與太祖書云珂非吾兄弟蓋余家之蒼頭也小字忠兒安得繼嗣珂亦上章云亡父有興復之功又遣使求援于太原李克用爲保薦于朝昭宗可之旣而珙厚結王行瑜李茂貞韓建爲援三鎮互相表薦昭宗詔諭之曰吾以太原與重榮有再造之功已俞其奏矣乾寧二年五月三鎮率兵入觀賊害時政請以河中授珙瑤又連兵以攻河中克用聞之出師以討三鎮瑤珙兵退晉師拔絳州擒瑤斬之及克用駐軍于渭北昭宗以珂爲河中節度使正授旄鉞

克用因以女妻珂珂至太原謝婚成禮克用令李嗣昭將兵助珂攻琪于陝焉光化末太祖謂張存敬曰珂恃太原之勢侮慢隣封爾爲我持一繩以縛之天復元年春存敬兵下晉絳令何緡守晉州以扼太原援師二月大軍逼河中珂妻書告太原曰敵勢攻逼朝夕爲俘囚乞食于大梁矣大人安忍不救克用曰前途旣阻衆寡不敵救則與爾兩亡可與王郎歸朝廷珂復求救于李茂貞茂貞不答珂勢窮蹙卽登城謂存敬曰吾與汴王有家世事分公宜退舍俟汴王至吾自聽命存敬卽日退舍三月太祖自洛陽至先哭于重榮之墓蒲人聞之

感悅珂欲面縛牽羊以見太祖曰太師阿舅之恩何時

可忘耶君若以亡國之禮相見黃泉其謂我何

歐陽史云梁太

祖自同州降唐卽依重榮以母王氏故事重榮爲舅

及珂出迎于路握手獻歎聯

轡而入乃以居敬守河中珂舉家徙于汴後入覲被殺于華州傳舍

珙少有俊氣才兼文武性甚驕虐屬世多故遂代伯父重霸爲陝州節度使爲政苛暴且多猜忌殘忍好殺不以生命爲意內至妻孥宗屬外則賓幕將吏一言不合則五毒將施鞭笞剗斮無日無之奢縱聚斂民不堪命由是左右惕懼憂在不測唐光化二年夏六月爲部將

李璠所殺璠自稱留後因是陝州不復爲王氏所有
史臣曰紹威始爲唐雄據魏地當土德之季運倡梁祖
以強禪在梁則爲佐命也在唐則豈得爲忠臣乎趙犇
以淮陽咫尺之地抗黃巢百萬之衆功成事立有足多
者巖穀非賢遽泯其嗣惜哉王珂奕世山河勢危被擄
乃魏豹之徒與

舊五代史卷十四

舊五代史卷十四攷證

梁列傳四羅紹威傳其後宏信封臨清王 案舊唐書

宏信先封豫章郡公進封北平王與是書異

自田氏已後垂二百年 案吳縝歐陽史纂誤云魏博

自田承嗣專據至羅紹威時共一百五十餘年歐陽

史作二百年誤蓋歐陽史仍是書之誤也

太祖自內黃馳至鄴 至鄴原本作至葉今據歐陽史

改正

歲漕百萬石以給宿衛太祖深然之 案通鑑攷異引

梁功臣傳云紹威馳簡獻替意互合者十得五六太

祖嘆曰竭忠力一人而已又引莊宗實錄曰紹威陰有覆溫之志而賂溫益厚溫怪其曲事慮蓄奸謀而莫之察乃賜紹威妓妾數人未半歲召還以此得其陰事其紀載互異如此竊謂紹威有謀慮得梁主信任宜也然以梁主雄險而紹威又因盡誅牙軍有自弱之悔則此時猜忌諒亦有之未可偏廢其說

趙犖傳父叔文 案叔文原本訛叔父今據新唐書改正

王僊芝起于曹濮 僊芝原本作僊苾今據新舊唐書改正

文德元年 文德原本作大德今改正

充大內皇牆使 皇牆原本作皇城攷五代會要梁時
避諱改皇城使爲皇牆使今改正

趙昶傳假寐于闔閭 闔閭原本作閭閻今改正

時宗權未滅 案上篇趙犇傳云蔡州平以犇爲忠武
軍節度使據此傳則昶爲忠武節度使宗權未滅二
傳互異

趙珣傳珣犇季弟也 案新唐書以珣爲犇子是書及
歐陽史通鑑皆以珣爲犇弟新唐書應訛

王珂傳小字忠兒 忠兒舊唐書作蟲兒

令何細守晉州 何細原本作何緯今據通鑑改正

舊五代史卷十四攷證

舊五代史卷十五

宋門下侍郎參知政事監修國史薛居正等撰

梁書第十五

列傳五

韓建字佐時許州長社人父叔豐世爲牙校初秦宗權之據蔡州招合亡命建隸爲軍士累轉至小校唐中和初忠武監軍楊復光起兵于蔡宗權遣其將鹿晏宏赴之建與里人王建俱隸晏宏軍入援京師賊平復光暴卒時僖宗在蜀晏宏率所部赴行在路出山南因攻剽郡邑據有興元晏宏自爲留後以建爲蜀郡刺史唐軍

容使田令孜密遣人誘建昭以厚利建時懼爲晏宏所併乃率所部歸行在令孜補爲神策都校金吾將軍出爲潼關防禦使兼華州刺史河潼經大寇之後戶口流散建披荆棘闢汚萊勸課農事樹植蔬果出入閭里親問疾苦不數年流亡畢復軍民充實建比不知書治郡之暇日課學習遣人于器皿牀榻之上各題其名建視之旣熟乃漸通文字俄遷華商節度潼關守捉等使累加檢校太尉平章事乾寧二年建與鳳翔李茂貞邠州王行瑜舉兵赴關迫昭宗請以王珙爲河中帥害大臣于都下河中王珂召晉軍以爲援及晉軍渡河昭宗幸

石門三年四月昭宗遣延王通王率禁兵討李茂貞爲
茂貞所敗車駕幸渭橋翼日次富平將幸河中建奉表
迎駕俄自至渭北懇乞東幸許之七月十五日昭宗至
華下百官士庶相繼而至建尋加兼中書令充京畿安
撫制置等使又兼京兆尹京城把截使昭宗久在華州
思還宮掖每花朝月夕遊宴西谿與羣臣屬詠歌詩獻
歎流涕建每從容奏曰臣爲陛下修營大內結信諸侯
一二年間必期興復乃以建兼領修創京城使建自華
督役輦運工作復治大明宮四年二月有詣建告睦王
已下八王謀殺建建囚八王子別宅放散隨駕殿後軍

二萬人殺捧日都頭李筠自是天子益微宿衛之士盡
矣八月建以兵圍十六宅通王已下十一王並遇害于
石隄谷以謀逆聞又害太子詹事馬道殷將作監許巖
士貶宰相朱朴皆昭宗寵昵者也建尋兼同州節度使
光化元年升華州爲興德府以建爲尹八月車駕還京
九月冊拜太傅進封許國公并賜鐵券天復元年十一
月宦官韓全誨迫天子幸鳳翔建亦預其謀太祖聞之
自河中引軍而西前鋒至同州建判官司馬鄴以城降
遂移軍迫華州建懼乞降太祖責以脅君之罪建拜伏
稱從事李巨川之謀也大祖卽誅巨川

北夢瑣言韓建
曰某不識字凡

朝廷章奏鄰封書檄皆巨川爲之因斬之又新唐書李巨川傳云巨川詣軍門納款因言當世利害全忠屬官敬翔以文翰事左右疑巨川用則全忠待己或衰乃詭說曰巨川誠奇才顧不利主人若何是日全忠殺之

太祖與建素有軍中昆弟之契及見其怒驟息尋表爲許州節度使昭宗東遷以建爲佑國軍節度使京兆尹車駕至陝召太祖與建侍宴宮妓奏樂何皇后舉觴以賜太祖建躡足太祖遽起曰臣醉不任僞若顛仆卽去建私謂太祖曰上與宮人附耳而語幕下有兵仗聲恐圖王爾天祐元年改青州節度使及受禪徵爲司徒平章事充諸道鹽鐵轉運使開平二年加侍中充建昌宮使三年郊祀于洛以建爲大禮使建爲上宰每謁見時

有直言太祖爲性剛嚴羣下將迎不暇待建稍異故優

容之九月冊拜太保罷知政事

五代會要開平三年十月詔曰太保韓建每月

旦十五日入閭稱賀卽令赴朝參餘時弗入見示優禮也

四年三月除匡國軍節度

使陳許蔡觀察使仍令中書不議除替

五代會要乾化元年正月敕云

許昌雄鎮太保韓建朕用以布政民耕盜止久居其位庶可勝殘矣宜令中書門下不計年月勿議替

乾

化二年六月朝廷新有內難人心動搖部將張厚因作

亂害建于衙署時年五十八子從訓昭宗在華時授太

子侍學賜名文禮尋拜屯田員外郎國初爲都官郎中

賜紫年未弱冠時朝廷命從訓告國哀于陳許至二日

軍亂與建併命乾化三年追贈太師

李罕之陳州項城人父文世田家罕之拳勇趨捷力兼
數人少學爲儒不成又落髮爲僧以其無賴所至不容
曾乞食于酸棗縣自旦至晡無與之者乃擲鉢于地毀
棄僧衣亡命爲盜會黃巢起曹濮罕之因合徒作剽漸
至魁首及賊巢渡江罕之因以兵將背賊歸于唐高駢
錄其功表爲光州刺史歲餘爲蔡賊秦宗權寇迫不能
守乃棄郡歸項城收合餘衆依河陽諸葛爽爽署爲懷
州刺史光啓初僖宗以爽爲東南面招討以擊宗權爽
乃表罕之爲副令將兵屯宋州蔡寇兇饑日熾兵鋒不
敵中和四年爽表罕之爲河南尹東都畱守是歲李克

用脫上源之難斂軍西歸路由洛陽罕之迎謁供帳館待甚優因與克用厚相結託時罕之有衆三千以聖善寺爲府光啓元年蔡賊秦宗權遣將孫儒來攻罕之對壘數月以兵少備竭委城而遁西保于澠池蔡賊據京城月餘焚燒宮闕剝剝居民賊旣退去鞠爲煨燼寂無雞犬之音罕之復引其衆築壘于市西明年冬諸葛爽死其將劉經推爽子仲方爲帥經懼罕之難制自引兵鎮洛陽罕之部曲有李瑋郭璆者情不相叶欲相圖害罕之怒誅璆軍情由是不睦劉經因其有間掩擊罕之于澠池軍亂保乾壕經急攻之爲罕之所敗罕之乘勝

追至洛陽時經保敬愛寺罕之保苑中飛龍廢罕之激
勵其衆攻敬愛寺數日因風縱火盡燔之經衆奔竄追
斬殆盡罕之進逼河陽營于鞏縣陳舟于汜水將渡諸
葛仲方遣將張言率師拒于河上時仲方年幼政在劉
經諸將心多不附張言密與罕之修好經知其謀言懼
引衆渡河歸罕之因合勢攻河陽爲經所敗罕之與言
退保懷州冬蔡將孫儒陷河陽仲方汎輕舟來奔孫儒
遂自稱節度使俄而蔡賊爲我軍所敗孫儒棄河陽歸
蔡罕之與言收合其衆求援于太原李克用遣澤州刺
史安金俊率騎助之遂收河陽克用表罕之爲節度同

平章事又表言爲河南尹東都畱守罕之旣與言患難交契刻臂爲盟永同休戚如張耳陳餘之義也罕之雖有胆決雄猜翻覆而撫民御衆無方略率多苛暴性復貪冒不得士心旣得河陽出兵攻晉絳時大亂之後野無耕稼罕之部下以俘剽爲資啖人作食絳州刺史王友遇以城降罕之乃進攻晉州河中王重盈遣使求援于太祖時張言治軍有法善積聚勤于播植軍儲不乏言輸粟于罕之以給其軍罕之求索無限言頗苦之力不能應罕之則錄河南府吏笞責之東諸侯修貢行在多爲罕之邀畱王重盈苦其侵削密結張言請圖之文

德元年春會罕之盡出其衆攻平陽言夜出師掩擊河陽罕之無備單步僅免舉族爲言所俘罕之奔于太原季克用表爲澤州刺史仍領河陽節度使三月克用遣其將李存孝率師三萬助之來攻懷孟城中食盡備豫皆竭張言遣其孥入質且求救于太祖太祖遣葛從周牛存節赴之逆戰于流河店會晉將安休休以一軍奔于蔡存孝引軍而退罕之保于澤州自是罕之日以兵寇鈔懷孟晉絳數百里內郡邑無長吏閭里無居民河內百姓相結屯寨或出樵汲卽爲俘馘雖奇峯絕磴梯危架險亦爲罕之部衆攻取先是蒲絳之間有山曰摩

雲邑人立棚于上以避寇亂罕之以百餘人攻下之軍中因爲之號曰李摩雲自是數州之民屠啖殆盡荆棘蔽野煙火斷絕凡十餘年乾寧二年李克用出師以拒邠鳳營于渭北天子以克用爲邠州行營四面都統克用乃表罕之爲副及誅王行瑜罕之以功授檢校太尉食邑千戶罕之自以功多私謂晉將蓋寓曰余自河陽失守來依巨廕歲月滋久功效未施比年已來倦于師旅所謂老夫耄矣無能爲也望吾王仁愍太傅哀憐與一小鎮休兵養疾一二年間卽歸老菟裘幸也寓爲言之克用不對每藩鎮缺帥議所不及罕之私心鬱鬱蓋

寓懼其他圖亟爲論之克用曰吾于罕之豈惜一鎮吾
有罕之亦如董卓之有呂布雄則雄矣鷹鳥之性飽則
颺去實懼翻覆毒余也光化元年十二月晉之潞帥薛

志勤卒罕之乘其喪自澤州率衆徑入潞州自稱畱後

以狀聞于克用曰聞志勤之喪新帥未至慮爲他盜所

窺不俟命已屯于潞矣克用怒遣李昭嗣討之罕之執

其守將馬漑伊鐸何萬友沁州刺史傅瑤等遣其子顥

拘送于太祖以求援焉

新唐書全忠表罕之昭義軍節度使

會罕之暴病

不能視事明年六月病篤太祖令丁會代之移罕之爲

河陽節度使行至懷州卒于傳舍時年五十八其子顥

以舟載柩歸葬河陰縣開平二年春詔贈中書令

馮行襲字正臣武當人也歷職爲本郡都校中和中僖宗在蜀有賊首孫喜者聚徒數千人欲入武當刺史呂煜惶駭無策略行襲伏勇士于江南乘小舟逆喜謂喜曰郡人得良牧衆心歸矣但緣兵多民懼擄掠若駐軍江北領肘腋以赴之使某前導以慰安士民可立定也喜然之旣渡江軍吏迎謁伏甲奮起行襲擊喜仆地仗劍斬之其黨盡殪賊衆在江北者悉奔潰山南節度使劉巨容以功上言尋授均州刺史州西有長山當襄漢蜀路羣賊屯據以邀劫貢奉行襲又破之洋州節度使

葛佐奏辟爲行軍司馬請將兵鎮谷口通秦蜀道由是益知名李茂貞遣養子繼臻竊據金州行襲攻下之因授金州防禦使時興元楊守亮將襲京師道出金商行襲逆擊大破之詔升金州爲節鎮以戎昭軍爲額卽以行襲爲節度使及太祖義旗西征行襲遣副使魯崇矩稟受制令會唐昭宗幸鳳翔太祖帥師奉迎久之未出中尉韓全誨遣中官郗文晏等二十餘人分命矯詔欲徵江淮兵屯于金州以脅太祖之軍行襲定策盡殺之收其詔敕送于太祖天祐元年兼領洋州節度使太祖之伐荆襄行襲令其子勗以舟師會于均房預收復功

遷匡國軍節度使到任誅大吏張澄暴其罪州人莫不
惴懾在許三年上供外別進助軍羨糧二十萬石及太
祖郊禋行襲請入覲貢獻巨萬恩禮殊厚尋詔翰林學
士杜曉撰德政碑以賜之累官至兼中書令冊拜司空
開平中卒輟朝一日贈太傅諡曰忠敬行襲性嚴烈爲
政深刻然所至有天幸境內嘗大蝗尋有羣烏啄食不
爲害民或艱食必有糶穀出于壠畝雖威福在已而恆
竭力以奉于王室故能保其功名行襲魁岸雄壯面有
青誌當時目爲馮青面長子勗歷蘄沁二州刺史次子
德晏仕至金吾將軍

孫德昭鹽州五原縣人世爲州校父惟最有功于唐朝

遙領荆南節度分判右神策軍事德昭藉父蔭累職爲

右神策軍都指揮使光化三年唐昭宗爲闈宦所廢矯

立德王時中外以權在禁闈莫能致討近藩朋附章表

繼有至者丞相崔允外與太祖申結輔佐之好內遣心

腹密講忠義有以事喻德昭者

通鑑德昭常惋憤不平崔允聞之遣判官石戡

與之游德昭每酒酣必泣戡知其誠乃密以允意說之德昭感慨乃與本軍孫承

誨董從實三人奮發應命誓圖返正崔又割衣手筆以

通其志天復元年正月一日未旦逆豎左軍容劉季述

早入德昭伏甲要路以俟追其前驅邀而斬之孫承誨

等分捕左軍容王仲先黨伍唐昭宗方幽辱東內聞外
喧大恐德昭馳至扣閣曰逆賊劉季述伏誅矣請上皇
開鑰復皇帝位皇后何氏呼曰汝可進逆人首門乃可
開俄而承誨從實俱以馘獻昭宗悲而嘉之于是丞相
崔允奉迎御丹鳳樓率百辟待罪泣且奏曰臣居大位
不能討姦賴東平王全忠首奮忠貞誅殺邸吏遂致德
昭等擒戮妖逆再清禁闈卽日議功以德昭爲檢校太
保靜海軍節度使承誨邕州節度使從實容州節度使
並同平章事錫姓李賜號扶傾濟難忠烈功臣圖形凌
烟閣俱畱京師錫賚宴賞之厚恩寵權倖之勢近代罕

此其年十一月闡宦韓全誨縱火脅昭宗西幸鳳翔承誨從實並變節爲中官所誘始欲驅擁百寮將圖出令而德昭獨按兵與太祖親吏婁敬思叶力衛丞相及文武百官與長安吏民保于街東免爲所劫太祖遣從事相繼勞問遺以龍鳳劍鬪雞紗委令制輯于是百官次華州連狀請太祖迎奉及大旆入關德昭以軍禮上謁立道左太祖命左右扶騎控至長安賜與甚厚署權知同州節度畱後將赴任復徇民請畱充兩街制置使賜錢百萬德昭以本部兵八千人獻于太祖由是愈見賞重又賜甲第一區俾先還洛陽及昭宗東遷奏授左威

衛上將軍以疾免歸于別墅太祖受禪以左領衛上將軍徵赴闕開平四年拜左金吾大將軍充街使末帝卽位俾將命于兩浙對見失儀不果行尋改授右武衛上將軍俄復左金吾大將軍卒于官詔贈太傅轅視朝一日天復初德昭與孫承誨董從實以返正功時人呼爲三使相恩澤俱冠世及承誨至鳳翔易名繼誨從實改名彥弼皆爲李茂貞所養後闕官之敗俱戮于京師惟德昭克全終始有所稱云

趙克裕河陽人也祖父皆爲軍吏克裕少爲牙將好讀書謹儀範牧伯皆奇待之累居右職擢爲虎牢關使光

啓中蔡寇陷河陽克裕率所部歸于太祖隸于宣義軍
太祖東征徐鄆克裕屢受指顧無不如意數年之內繼
領毫鄭二州刺史時關東藩鎮方爲蔡寇所毒黎元流
散不能相保克裕妙有農戰之備復善于綏懷民賴而
獲安者衆太祖表爲河陽節度使檢校右僕射尋移理
許田入爲金吾衛大將軍檢校司空及太祖爲元帥以
克裕爲元帥府左都押衙復統六軍克州平命權知秦
寧軍畱後數月暴疾而卒開平初追贈太保

張慎思清河人自黃巢軍來歸累受軍職歷諸軍都指
揮使從平巢蔡克鄆皆著功表授檢校工部尚書兼宋

州長史光化中加檢校右僕射權知亳州天復三年昭宗還長安以從太祖迎駕功賜號迎鑾毅勇功臣尋除汝州防禦使天祐元年授左龍武統軍其冬除許州匡國軍節度使明年十一月權知徐州武寧軍兩使留後太祖受禪入爲左金吾大將軍開平二年除宋州刺史未幾復拜左金吾大將軍三年冬除蔡州刺史以貪貨大失民情詔追赴闕未幾扈從北征還以疾臥洛陽之私第馭家不肅爲其子所弑

史臣曰韓建遇唐朝之衰運據潼關之要地不能藩屏王室翻務斲喪宗枝雖有阜俗之能何補不臣之咎罕

之負驍雄之氣蓄向背之謀武皇比之呂布斯知人矣
行龔勵納忠之節德昭立反正之功俱善其終固其宜
矣克裕而下無譏可也

舊五代史卷十五

舊五代史卷十五攷證

梁列傳五韓建傳又害太子詹事馬道殷將作監許巖
士 案新唐書昭宗紀正月乙酉韓建殺扈蹕都將
李筠二月殺太子詹事馬道殷將作監許巖士八月
殺通王滋沂王禪韶王彭王嗣韓王嗣陳王嗣覃王
嗣周王嗣延王戒丕嗣丹王允通鑑與新唐書同是
書以殺李筠爲二月事以殺馬道殷許巖士爲八月
事蓋本于舊唐書昭宗紀

李罕之傳伊鐸 案歐陽史作伊鐸

遣其子顯 案歐陽史作遣子顯

馮行襲傳尋授均州刺史 案新唐書本紀光啓元年

四月武當賊馮行襲陷均州逐其刺史呂煜蓋行襲
既殪孫喜遂自據其郡也是書作中和間事與唐書
異歐陽史仍從是書

孫德昭傳父惟最有功於唐朝 案惟最歐陽史作惟
最攷新唐書亦作惟最今仍其舊

乃與本軍孫承誨董從實三人 案孫承誨董從實新
舊唐書並作周承誨董彥弼攷承誨姓周與孫未知
孰是從實改名彥弼見本傳後文歐陽史與是書同

趙克裕傳尋移理許田 案克裕移理許田是書未明

言其故新唐書本紀朱全忠陷孟州逐河陽節度使
趙克裕據通鑑則克裕移鎮因梁祖欲以張全義領
河陽也新唐書所紀疑非事實

舊五代史卷十五攷證

舊五代史卷十六

宋門下侍郎參知政事監修國史薛居正等撰

梁書第十六

列傳六

葛從周字通美濮州鄆城人也曾祖阮祖遇賢父簡累贈兵部尚書從周少豁達有智略初入黃巢軍漸至軍校唐中和四年三月太祖大破巢軍于王滿渡從周與霍存張歸霸昆弟相率來降七月從太祖屯兵于西華破蔡賊王夏寨太祖臨陣馬踣賊衆來追甚急從周扶太祖上馬與賊軍格鬪傷面矢中于肱身被數槍奮命

以衛太祖賴張延壽迴馬轉鬪從周與太祖俱免退軍
澗水諸將並削職惟擢從周延壽爲大校其後入長葛
靈井大敗蔡賊至斤溝淝河殺鐵林三千人獲九寨都
虞候王涓太祖遣郭言募兵于陝州有黃花子賊據于
溫谷從周擊破之又破秦賢之衆于滎陽尋佐朱珍收
兵于淄青間時兗州齊克讓軍于任城從周敗之擒其
將呂全真淄人不受制復與之戰獲其驍將鞏約會青
州以步騎萬餘人列三寨于金嶺以扼要害從周與朱
珍大殲其衆擄其將楊昭範五人而還至大梁不解甲
徑至板橋擊蔡賊破盧瑋寨瑋自溺而死又于赤堋殺

蔡軍二萬餘人從討謝殷于亳州擒之迴襲曹州擄刺史丘宏禮以歸與兗鄆軍遇于臨濮之劉橋殺數萬人朱瑄朱瑾僅以身免擒都將鄒務卿已下五十人從太祖至范縣復與朱瑄戰擄尹萬榮等三人遂平濮州未幾與朱珍擊蔡賊于陳亳間獲都將石璠文德元年魏博軍亂樂從訓來告急從太祖渡河拔黎陽李固臨河等鎮至內黃破魏軍萬餘衆獲其將周儒等十人李罕之引并人圍張全義于河陽從周與丁會張存敬牛存節率兵赴援大破并軍殺蕃漢二萬人解河陽之圍以功表授檢校工部尚書從朱珍討徐州拔豐縣敗時溥

于吳康得其輜重加檢校刑部尚書佐龐師古討孫儒于淮南略地至廬壽滁等州下天長高郵破邵伯堰迴軍攻濠州殺刺史魏勲得餉船十艘大順元年八月并帥圍潞州太祖遣從周率敢死之士夜銜枚犯圍而入會王師不利于馬牢川卽棄上黨而歸其年十二月與丁會諸將討魏州連收十邑明年正月大破魏軍于永定橋魏軍五敗斬首萬餘級十月佐丁會攻宿州從周壅水灌其城刺史張筠以郡降從討兗州破朱瑾之軍于馬溝景福二年二月與諸將大破徐兗之兵于石佛山八月與龐師古同攻兗州乾寧元年三月軍至新泰

縣朱瑾令都將張約李胡椒率三千人來拒戰師古遣從周張存敬掩襲生擒張約李胡椒等都將數十人二年十月圍兗州兗人不出從周詐揚言并人鄆人來救卽引軍趨高吳夜半卻潛歸寨朱瑾果出兵攻外壕我軍士突出掩殺千餘人生擒都將張漢筠從周累立戰功自懷州刺史歷曹宿二州刺史累遷檢校左僕射三年五月并帥以大軍侵魏遣其子落落率二千騎屯洹水從周以馬步二千人擊之殺戮殆盡擒落落于陣并帥號泣而去遂自洹水與龐師古渡河擊鄆四年正月下之從周乘勝伐兗會朱瑾出師在徐境其將康懷英

以城降以功授兗州留後檢校司空

玉堂閒話云葛侍中鎮兗之日威名

著于敵中河北諺曰山東一條葛無事莫撩撥

復領兵萬餘人渡淮討楊行密

至濠州聞龐師古清口之敗遽班師光化元年四月率師經略山東時并帥以大軍屯邢洛從周至鉅鹿與并軍遇大破之并帥遁走我軍追襲至青山口數日之內邢洛磁三州連下斬首二萬級獲將吏一百五十人卽

以從周兼領邢州留後十月復破并軍五千騎于張公橋晉將李嗣昭急攻邢州陣于城門外從周大破之擒蕃將賁金鐵慕容騰百餘人二年春幽州劉仁恭率軍十萬寇魏州屠貝郡從周自邢臺馳入魏州燕軍突上

水關攻館陶門從周與賀德倫率五百騎出戰謂門者曰前有敵不可返顧命闔其門從周等極力死戰大敗燕人擒都將薛突厥王郃郎等翼日破其八寨追擊至臨清劉仁恭走滄州從周授宣義軍行軍司馬五月并人討李罕之于潞州太祖以丁會代罕之令從周馳入上黨七月并人陷澤州太祖召從周令賀德倫守潞州德倫等尋棄城而歸三年四月領軍討滄州先攻德州下之及進攻浮陽幽州劉仁恭大舉來援時都監蔣元暉謂諸將曰吾王命我護軍志在攻取今燕帥來赴不可迎戰當縱其入壁聚食困廩力屈糧盡必可取也從

周對曰兵在機機在上將非督護所言也乃令張存敬
氏叔琮守其寨從周逆戰于乾寧軍老鷄堤大破燕軍
斬首三萬獲將佐馬慎交已下百餘人奪馬三千匹八
月并人攻邢洛從太祖破之從周追襲至青山口斬首
五千級獲其將王郃郎楊師悅等得馬千匹表授檢校
太保兼徐州兩使留後尋爲兗州節度使天復元年三
月與氏叔琮討太原從周以兗鄆之衆自土門路入與
諸將會于晉陽城下以糧運不給班師頃之從周染疾
會青州將劉鄩陷兗州太祖命討之遂力疾臨戎三年
十一月鄩舉城降以功授檢校太傅太祖以從周抱疾

既久命康懷英代之授左金吾上將軍以風恙不任朝
謁改右衛上將軍致仕養疾偃師縣亳邑鄉之別墅頃
之授太子太師依前致仕末帝卽位制授潞州節度使
令坐食其俸加開封儀同三司檢校太師兼侍中封陳
留郡王累食邑至七千戶命近臣賚旌節就別墅以賜
之貞明初卒于家冊贈太尉

謝彥章許州人幼事從周爲養父從周憐其敏慧教以
兵法常以千錢于大盤中布其行陣偏伍之狀示以出
沒進退之節彥章盡得其訣及壯事太祖爲騎將末帝
嗣位用爲兩京馬軍都軍使累與晉軍接戰有功尋領

河陽節度使及從周卒臨喪行服躬預葬事時人義之
彥章後爲許州節度使檢校太傅貞明四年冬滑州節
度使賀瓌爲北面招討使彥章爲排陣使同領大軍駐
于行臺寨與晉人對壘彥章時領騎軍與之挑戰晉人
或望我軍行陣整肅則相謂曰必兩京太傅在此也不
敢以名呼其爲敵人所憚如此是時咸謂賀瓌能將步
軍彥章能領騎士旣名聲相軋故瓌心忌之一日與瓌
同設伏于郊外瓌指一方地謂彥章曰此地岡阜隆起
中央坦夷好列柵之所尋而晉人舍之故瓌疑彥章與
晉人通又瓌欲速戰彥章欲持重以老敵人瓌益疑之

會爲行營馬步都虞候朱珪所誣壞遂與珪協謀因享
士伏甲以殺彥章及濮州刺史孟審澄別將候溫裕等
于軍以謀叛聞晉王聞之喜曰彼將帥如是亡無日矣
審澄溫裕亦善將騎軍然所領不過三千騎多而益辦
惟彥章有焉將略之外好優禮儒士與晉人對壘于河
上恒褒衣博帶動皆由禮或臨敵御衆則肅然有上將
之威每敦陣整旅左旋右抽雖風馳雨驟亦無以喻其
迅捷也故當時騎士咸樂爲用及其遇害人皆惜之
胡眞江陵人也體貌洪壯長七尺善騎射少爲縣吏及
在巢寇中寇推爲名將隨巢涉淮浙陷許洛入長安及

太祖以衆歸唐真時爲元從都將

通鑑云溫見巢兵勢日蹙知其將亡親將

胡真謝朏勸溫歸國

從至梁苑表授檢校刑部尚書頻從破巢蔡

于陳鄭間尋以奇兵襲取滑州乃署爲滑州節度留後復表爲鄭滑節度使檢校右僕射數年徵爲右金吾衛大將軍俄拜寧遠軍節度使容州刺史檢校太保卒贈太傅

張歸霸字正臣清河人祖進言陽穀令父實亦有宦緒少倜儻好兵術唐乾符中寇盜蜂起歸霸率昆弟三人棄家投黃巢頗以勇略聞巢陷長安遂署爲左番功臣中和中巢領徒走宛邱時太祖在汴奉詔南討巢黨日

窘歸霸昆仲與葛從周李讜等相率來降尋補宣武軍
劇職光啟二年與蔡將張存戰于盧氏三年夏又與蔡
將盧瑋戰于雙邱復與秦宗賢戰于萬勝皆敗而殲之
翼日宗權遣將張邳來寇列寨于赤堽一日出騎將較
勝歸霸爲飛戈所中卽拔馬卻逸控弦一發賊洞頸而
墜遂兼騎而還太祖時于高邱下瞰備見其狀面加賞
激厚以金帛及所獲馬錫之又嘗被命以控弦之士五
百人伏于壕內太祖統數百騎稍逼其寨蔡人果以銳
士摩壘來追歸霸發伏兵掩殺千餘人奪馬數十匹尋
奏授檢校左散騎常侍其後從太祖伐鄆副李唐賓渡

淮威著奇績文德初大軍臨蔡州賊將蕭顥來斫寨歸
霸與徐懷玉各以所領兵自東南二扉分出合勢殺賊
蔡人大敗及太祖振衆離營寇塵已息太祖召至賞之
曰昔耿弇不俟光武擊張步言不以賊遺君父弇之功
爾其二焉大順中郭紹賓拔曹州歸霸提兵數千守之
俄而朱瑾統大軍自至歸霸與丁會逆擊之于金鄉瑾
大敗擒賊將宗江等七十餘人曹州以寧明年破濮州
生擒刺史邵儒又佐葛從周與晉軍戰于洹水生獲克
用愛子落落復與燕人戰于內黃殺仁恭兵三萬餘衆
戎績超特居諸將之右累官至檢校左僕射光化二年

權知邢州事明年春李嗣昭以蕃漢五萬來寇歸霸堅壁設備晉軍不敢顧其城遂移軍攻洛州陷焉時太祖在滑頗慮邢之失守及葛從周復洛嗣昭北遁歸霸出兵襲之殺二萬餘衆捷至賞錫殊等旋以功奏加檢校司空天祐初遷萊州刺史秩滿授左衛上將軍又除曹州刺史其秋加檢校司徒副劉知俊禦邠鳳之寇敗之太祖受禪拜右龍虎統軍改左驍衛上將軍充河陽諸軍都指揮使明年夏六月就除河陽節度使檢校太保尋加同平章事二年秋七月卒于位詔贈太傅梁末帝德妃張氏卽歸霸女也末帝嗣位以歸霸子漢鼎漢傑

並爲近職漢鼎早亡漢傑貞明中爲控鶴指揮使領兵討惠王于陳州擒之當貞明龍德之際漢傑昆仲分掌權要藩鎮除拜多出其門段凝因之遂竊兵柄及莊宗入汴漢傑與兄漢倫弟漢融同日伏誅于汴橋下

張歸厚字德坤

通鑑攷異引梁功臣列傳云歸厚祖典父處讓

少驍勇有機略

尤長于弓槩之用中和末與兄歸霸自巢軍相率來降太祖署爲軍校時淮西兵力方壯太祖之師尚寡歸厚以少擊衆往無不捷光啟三年春與秦宗賢戰于萬勝大破之其夏蔡將張晔以數萬衆屯于赤墘歸厚嘗與晔單騎鬪于陣晔不能支而奔師徒乘此大捷太祖大

悅立署爲騎軍長仍以鞍馬器幣錫之及佐朱珍討時溥寨于豐蕭之間歸厚乘徐壘如行坦途甚爲諸將歎伏龍紀初奏遷檢校工部尚書其年冬復伐徐歸厚以偏師逕進至九里山下與徐兵遇時我之叛將陳璠在賊陣中歸厚忽見之因噴目大罵單馬直往期于必取會飛矢中左目而退徐戎甚衆莫敢追之大順元年奏加檢校兵部尚書又命統親軍是歲郴王遷寨未知所往忽逢兗鄆賊寇甚衆太祖亟登道左高阜以觀之命歸厚領所部廳子馬直突之出沒二十餘合賊大敗將北而救軍雲至歸厚卽綴賊苦戰請太祖以數十騎先

還時歸厚所乘馬中流矢而踣乃持槩步鬪漸退賊不敢逼太祖至寨亟命張筠劉儒飛騎來迎然謂已歿矣歸厚體被二十餘箭尚復拒戰筠等既至賊解乃歸太祖見之撫背泣下曰得歸厚身全縱廣喪戎馬何足計乎便令肩舁歸汴日降問賚恩旨甚厚尋遷中軍指揮使景福初從太祖伐鄆帝軍不利太祖爲寇所逼歸厚殿馬翼衛左右馳射矢發如雨賊騎千百披靡而退明年與葛從周禦晉軍于洹水殊績尤著詔加檢校右僕射其後討滄州復洛州咸以功聞太祖錄其勳命權知洛州事是郡嘗兩爲晉人所陷并邑蕭條歸厚撫之數

月之內民庶翕然太祖自鎮定還觀其緝理之政大喜
賞之天復元年冬真拜洛州刺史加檢校左僕射尋授
絳州刺史三年秋改晉州刺史仍檢校司空唐帝遷都
洛陽除右神武統軍天祐二年改左羽林統軍與徐懷
玉同守澤州時晉軍五萬來攻郡中戎士甚寡歸厚極
力拒守并軍乃還太祖受禪加檢校司空開平二年夏
劉知俊以同州叛歸厚副楊師厚劉鄩等討平之秋軍
還授亳州團練使乾化二年拜鎮國軍節度使陝虢等
州觀察處置等使明年夏以疾卒于位贈太師子漢卿
張歸弁字從冕始與其兄歸霸歸厚同歸于太祖得署

爲牙校時太祖初鎮宣武屢命歸弁結好于近境頗得
行人之儀乾寧中以偏師佐葛從周禦并軍于洹水光
啟中又佐張存敬與燕人戰于內黃積前後功表授檢
校工部尚書大順初攻討兗鄆命歸弁佐衡王友謙屯
單父軍聲大振尋爲齊州指揮使屬青帥王師範叛遣
將詐爲賈人挽車數十乘匿兵器于其中將謀竊發歸
弁察而擒之州城以寧明年春青寇大舉來伐州兵旣
寡民意頗搖有本郡都將康文爽等三人欲謀外應卽
時擒獲誅之人心遂定歸弁又罄發私帑賞給士伍青
人遂遁青州平超加檢校右僕射遙領愛州刺史從征

荆襄迴轉檢校左僕射天祐三年春太祖入魏誅牙軍
魏之郡邑多叛歸弁與諸將等分布攻討封境悉平而
歸弁于高唐攻賊太猛飛矢中于臆太祖嘉之命賜鞍
勒馬一匹金帶一條夏五月命權知晉州冬十一月真
授晉州刺史加檢校司空太祖受禪改滑州長劔指揮
使開平二年秋九月并軍圍平陽詔歸弁統兵救之軍
至解其圍加檢校司徒三年春三月寢疾卒于滑州之
私第子漢融

史臣曰從周以驍武之才事雄猜之主而能取功名于
馬上啟手足于牖下靜而言之斯爲賢矣彥章蔚有將

才死于讒口身既歿矣國亦隨之惜哉歸霸昆仲皆脫
身于巨盜之流宣力于興王之運由介冑而析圭爵可
不謂壯夫與

舊五代史卷十六攷證

梁書列傳六葛從周傳破蔡賊王夏寨 王夏原本作

五夏今據通鑑改正

從周詐揚言并人鄆人來救 案通鑑朱瑄朱瑾告急

于河東李克用遣大將史儼李承嗣將數千騎假道

于魏以救之是河東實遣師來援非從周詐言也此

蓋覘知兗人告急乘并師尚未至乃揚言已至多方

以誤之耳又本紀作十二月此作十月辨正已見本

紀

養疾偃師縣亳邑鄉之別墅 別墅原本作別塋今改

正

謝彥章傳必兩京太傅在此也 兩京原本作西京今

據通鑑改正

張歸霸傳歸霸爲飛戈所中 飛戈歐陽史作飛矢

張歸厚傳命歸厚領所部廳子馬 廳子馬原本作厲

子馬攷通鑑注廳子都係當時軍旅之名今改正

與葛從周禦晉軍于洹水 葛從周原本作郭從周今

據通鑑改正

舊五代史卷十六攷證

舊五代史卷十七

宋門下侍郎參知政事監修國史薛居正等撰

梁書第十七

列傳七

成汭淮西人少年任俠乘醉殺人爲讎家所捕因落髮

爲僧冒姓郭氏

新唐書云入蔡賊中爲賊帥假子更姓名爲郭禹

亡匿久之及

費方復本姓唐僖宗朝爲蔡州軍校領本郡兵戍荆南

帥以其凶暴欲害之遂棄本軍奔于秭歸一夕巨蛇繞

其身幾至于殞乃祝曰苟有所負死生惟命遂巡蛇亦

解去後據歸州招集流亡練士伍得兵千餘人沿流以

襲荆南遂據其地朝廷卽以旄鉞受之是時荆州經巨盜之後居民才一十七家泐撫輯凋殘勵精爲理通商訓農勤于惠養比及末年僅及萬戶泐性豪暴事皆意斷又好自矜伐騁辯凌人深爲識者所鄙初澧朗二州本屬荆南乾寧中爲土豪雷滿所據泐奏請割隸唐宰相徐彥若執而不行泐由是銜之及彥若出鎮南海路過江陵泐雖加延接而猶怏怏嘗因對酒語及其事彥若曰令公位尊方面自比桓文雷滿者偏州一草賊爾令公盍加兵而反怨朝廷乎泐赧然而屈

案以下累官有闕文

至檢校太尉封上谷郡王楊行密以兵圍鄂州泐出師

以援鄂淮寇乘之以火焚其艦泖投江而死天祐三年

夏太祖以泖歿于王事上表于唐帝請爲泖立廟于荆

門優詔可之

五代史補鄭準不知何許人性諒直能爲文長于箋奏成泖鎮荆南辟爲推官泖嘗

爲表乞歸本姓準援筆而成其略云臣門非冠蓋家本

軍戎親朋之內盱眙爲人報怨昆弟之間黠染無處求

于陶朱志切投秦出境遂稱于張祿又云成爲本姓郭

乃冒稱本避犯禁之辜敢歸司寇別族受封之典誠愧

諸侯伏乞聖慈許歸本姓云云其表甚爲朝廷所重後

因泖生辰淮南楊行密遣使致禮幣之外仍賜初學記

一部準忿然以爲不可謂泖曰夫初學記蓋訓童之書
爾今敵國交聘以此書爲貺得非相輕之甚耶宜書責
讓泖不納準自歎曰若然見輕敵國足彰幕府之無人
也參佐無狀安可久違請解職泖怒其去潛使人于途
申殺之

杜洪者江夏伶人鍾傳者豫章小校唐光啟中秦宗權

凶焰颺起屢擾江淮郡將不能城守洪傳各爲部校因

戰立威逐其廉使自稱留後朝廷因而命之新唐書光啟二年洪

乘虛入鄂自爲節度留後僖宗卽拜本軍節度使中和

三年傳逐江西觀察使高茂卿遂有洪州僖宗擢傳江

西團練使俄拜鎮南節度使及爲楊行密所攻洪傳首尾相應皆遣

求援于太祖太祖遣朱友恭赴之大破淮寇于武昌二

鎮稍寧及行密乘勝急攻洪鄂洪復乞師于太祖太祖

命荆南成汭率荆襄舟師以赴之未至夏口汭敗溺死

淮人遂陷鄂州洪爲其擒被害于廣陵市時唐天復二

年也九國志劉存傳存急焚鄂州城樓梁援兵將突圍而出諸將欲急擊之存曰擊之賊必復入復入則

城愈固矣不若聽其遁去諸將皆曰善是日城陷擒杜共父子斬于廣陵市

天祐三年夏太

祖表請爲洪立廟于其鎮優詔可之太祖卽位詔贈太

傅先是鍾傳卒于江西其子繼之

九國志秦裴傳天祐三年洪州鍾傳卒州

人立其子匡時江州刺史延規傳之養子念不得立以其郡納款因授裴西南面行營招討使攻匡時城陷擒

匡時以獻尋爲楊行密所敗其地亦入于淮夷

五代史補鍾傳雖起于商

販尤好學重士時江西上流有名第者多因傳薦四遠騰然謂之曰英明諸葛浩素有詞學嘗爲泗州館驛巡

官仰傳之風因擇其所行事赫赫可稱者十條列于啟事以投之十啟凡五千字皆文理典贍傳覽之驚嘆謂

賓佐曰此啟事每一字可以千錢酬之遂以五千貫贈仍辟在幕下其激勸如此上藍和尚失其名居于洪

州上藍院精究術數大爲鍾傳所禮一旦疾篤徃省之且曰老夫于和尚可謂無間矣和尚或不諱得無一言

相付耶上藍強起索筆作偈以授其末云但看來年二月三月柳條堪作打鐘槌偈終而卒傳得之不能測洎明

年春淮帥引兵奄至洪州陷江南
遂爲楊氏有打鐘之偈人始悟焉

田頽本揚府之大校也

九國志頽字德臣廬州合肥人

朱延壽不知何

許人

九國志延壽廬州舒城人

唐天祐初楊行密雄據淮海時頽爲

宣州節度使延壽爲州刺史頽以行密專恣跋扈嘗移
書諷之曰侯王守方以奉天子古之制也其或踰越者
譬如百川不朝于海雖狂奔猛注澶漫遐廣終爲涸土
不若恬然順流淼茫無窮也況東南之鎮楊爲大塵賤
刀布阜積金玉願公上恒賦頽將悉儲峙具單車從行
密怒曰今財賦之行必由于汴適足以資于敵也不從
時延壽方守壽春

九國志天復初北司擁駕西幸昭宗聞延壽有武幹遣李儼問道齎詔授

延壽蔡州節度使直頽之事密遣人告于頽曰公有所欲爲者

願爲公執鞭頽聞之頗會其志乃召進士杜荀鶴具述

其意復語曰昌本朝奉盟主在斯一舉矣卽遣荀鶴具

述密議自間道至大梁太祖大悅遽屯兵于宿州以會

其變不數月事微洩行密乃先以公牒徵延壽新唐書行密妻

延壽姊也遣辯士召延壽疑不肯赴姊遣婢報故延壽疾走揚州次悉兵攻宣城頽戎

力寡薄棄壁走不能越境爲行密軍所得九國志行密別遣臺濛王

茂章率步騎以在頽委舟師于汪建王壇自出廣德迎戰大爲濛所敗遂率殘衆遁保宛陵壇建聞其敗因盡

以舟師歸欵于行密十二月頽出外州柵疾戰橋陷馬墜爲外軍所殺延壽飛騎赴命適

揚州一舍行密使人殺之其後延壽部曲有逸境至者

具言其事又云延壽之將行也其室王氏勉延壽曰今若得兵柄果成大志是吉凶繫乎時非繫于吾家也然願日致一介以寧所懷一日介不至王氏曰事可知矣乃部分家屬悉授兵器遽闔中扉而捕騎已至不得入遂集家屬阜私帑發百燎合州廨焚之既而稽首上告曰妾誓不以皎然之軀爲讎者所辱乃投火而死

五代史補

楊行密據淮南以妻弟朱氏衆謂之朱三郎者行密署爲泗州防禦使泗州素屯軍朱氏驍勇到任侍衆自負行密雖悔度力未能制但姑息之時議以謂行密事勢去矣居無何行密得目疾雖瘡且詐稱失明其出入皆以人扶策不爾則觸牆抵柱至于流血姬妾僕隸以爲實然往往無禮首尾僅三年朱氏聞之信而少懈弛行密度其計必中謂妻曰吾不幸臨老兩目如此男女卑幼苟不諱則國家爲他人所有今晝夜思忖不如召泗

州三舅來使管句軍府事則吾雖死無恨妻以爲然遽發使述其意而召之朱氏大喜倍道而行及入謁行密恐其覺坐于中堂以家人禮見朱氏頗有德色方設拜行密奮袖中鐵槌以擊之正中其首然猶宛轉號叫久而方斃行密內外不測卽時升堂廳召將吏等謂之曰吾所以兩目失明者蓋爲朱三此賊今已擊殺兩目無事矣諸公知之否于是軍府大駭其僕妾嘗所無禮者皆自殺初行密之在民間也嘗爲合肥縣手力有過縣令將鞭之行密懼且拜會有客自外入見行密每拜則聽之前簷皆叩地而令不之覺客知其非常乃遽升堂揖令于他處告以所見令驚遂恕之且勸事郡以自奮行密度本郡不足依乃投高駢駢死秦彥孫儒等作亂行密連誅之遂

有淮南之地

趙匡凝

新唐書匡凝字光儀

蔡州人也父德諲初事秦宗權爲列

校當宗權強暴時表爲襄州畱後唐光啟四年夏六月德諲審宗權必敗乃舉漢南之地以歸唐朝仍遣使投

分于太祖兼誓戮力同討宗權時太祖爲蔡州四面行營都統使乃表德誼爲副仍領襄州節度使蔡州平以功累加官爵封淮安王匡凝以父功爲唐州刺史兼七州馬步軍都校及德誼卒匡凝自爲襄州留後朝廷卽以旄鉞授之作鎮數年甚有威惠累官至檢校太尉兼中書令匡凝氣貌甚偉好自修飾每整衣冠必使人持巨鑑前後照之對客之際烏巾上微覺有塵卽令侍妓持紅拂以去之人有誤犯其家諱者往往遭其櫛楚其方嚴也如是光化初匡凝以太祖有清口之敗密附于淮夷太祖遣氏叔琮率師伐之未幾其沁州刺史趙璠

越墉來降隨州刺史趙匡璘臨陣就擒俄而康懷英攻
下鄧州匡疑懼遣使乞盟太祖許之自是附庸于太祖
及成汭敗于鄂州匡疑表其弟匡明爲荆南留後是時
唐室微弱諸道常賦多不上供惟匡疑昆仲雖強據江
山然盡忠帝室貢賦不絕太祖將期受禪以匡疑兄弟
竝據藩鎮乃遣使先諭旨焉匡疑對使者流涕答以受
國恩深豈敢隨時妄有他志使者復命太祖大怒天祐
二年秋七月遣楊師厚率師討之八月太祖親領大軍
南征仍請削匡疑在身官爵及師厚濟江匡疑以兵數
萬逆戰大爲師厚所敗匡疑乃燔其舟單舸急棹沿漢

而遁于金陵後卒于淮南

新唐書云師厚繇陰谷伐大為梁匡凝以兵二萬瀕江戰

大敗乃燔舟單舸夜奔揚州行密見之曰君在鎮輕車重馬輸于賊今敗乃歸我耶匡明亦謀奔淮南子承規

諫曰昔諸葛兄弟分仕二國若適揚州是自取疑也匡明乃趣成都歐陽史云行密厚遇匡凝其後行密死楊

渥稍不禮渥方宴食青梅匡凝顧渥曰勿多食發小兒熱諸將以為慢渥遷匡凝海陵後為徐溫所殺

初匡凝好聚書及敗楊師厚獲千卷于第悉以來獻匡凝

弟匡明字贊堯幼以父貴一子出身為江陵府文學及

壯以軍功歷繡岐二州刺史成汭之敗其兄匡凝表為

荆南留後未至鎮而朗陵之兵先據其城矣匡明領兵

逐之遂鎮于渚宮天祐二年秋太祖既平襄州遣楊師

厚乘勝以趨荆門匡明懼乃舉族上峽奔蜀王建待以

賓禮及建稱帝用爲大理卿工部尚書久之卒于蜀

張佶不知何郡人也

九國志佶京兆長安人乾寧初以明經中第累遷宣州從事復爲秦

宗權行軍司馬後與劉建

唐乾寧初劉建峯據湖南獨

邵州不賓命都將馬殷討之期歲未尅而建峯爲部下

所殺軍亂鄰寇且至是時佶爲行軍司馬屬潭人謀帥

曰張行軍卽所奉也佶不得已而視事旬日之間威聲

大振寇亦解去

九國志建峯將吏推佶爲帥佶將入府常所乘馬忽爾蹊齧不止正中佶解佶

謂將吏曰吾非汝

主當迎馬公爲之乃謂將吏曰佶才能不如馬公況朝

廷重藩非其人不可因以牘召殷亦不疑稟命而至佶

受拜謁禮畢命升階讓殷爲帥佶卽趨下率衆拊賀乃

自請率師代殷攻邵州下之復爲行軍司馬垂二十年
殷果立大勳甚德佶開平初殷表佶爲朗州永順軍節
度使累加檢校太傅同平章事乾化元年夏四月卒于
位

九國志乾化初移鎮桂林卒于治所

詔贈侍中

雷滿

新唐書滿字秉仁

武陵洞蠻也始爲朗州小校唐廣明初

王仙芝焚劫江陵是時朝廷以高駉爲節度使駉擢滿
爲裨將以領蠻軍駉移鎮淮南復隸部曲以悍獷趨健
知名中和初擅率部兵自廣陵逃歸于朗沿江恣殘暴
始爲荆人大患矣率一歲中三四移兵入其郛焚蕩驅
掠而去唐朝姑務息兵卽以澧朗節度使授之累官至

檢校太傅同平章事滿貪穢慘毒蓋非人類又嘗于府署濬一深潭構大亭于其上每鄰道使車經由必召燕于中且言此水府也中有蛟龍奇怪萬態惟余能游焉

或酒酣對客卽取筵中寶器亂擲于潭中因自褫其衣裸露其文身遽躍入水底徧取所擲寶器戲弄于水面

久之方出復整衣就座其詭誕如此及死子彥恭繼之

新唐書滿以天復元年卒子彥威自立弟彥恭結忠義節度使趙匡疑以逐彥威 蠻蜚狡獪深

有父風燼墟落榜舟楫上下于南郡武昌之間殆無人矣又與淮蜀結連阻絕王命太祖詔湖南節度使馬殷荆南節度使高季昌練精兵五千遣將倪可福統之下

澧州與潭兵合先是滿塹沅江以周其壘門臨長橋勢不可入殷極其兵力攻圍周歲彥恭食盡兵敗間使求救于淮夷及淮軍來援高季昌逆戰于治津馬頭岸大破之俄而攻陷朗州彥恭單棹遁去馬殷擒其弟彥雄及逆黨七人械送至闕皆斬于汴橋下時開平二年十一月也

史臣曰成汭鍾杜田朱之流皆因否運雄據大藩雖無濟代之勞且有勤王之節功雖不就志亦可嘉若較其誠明則田頽延壽斯爲優矣匡凝一門昆仲千里江山失守藩垣不克負荷斯乃劉景升之子之徒歟張佶有

讓帥之賢雷滿辱俾侯之寄優劣可知矣

舊五代史卷十七

舊五代史卷十七攷證

梁列傳七成汭傳唐宰相徐彥若 彥若原本作產若

今據新唐書改正

田頽傳延壽邇揚州一舍行密使人殺之 案九國志
行密迎至寢門使人刺殺之新唐書從九國志是書
以爲揚州見殺五代史補又以爲行密自奮鐵槌殺
之傳聞各異

雷滿傳彥恭單棹遁去 案通鑑攷異引梁太祖實錄
云彥恭沒溺于江通鑑從紀年錄作奔廣陵歐陽史

與通鑑同

舊五代史卷十七攷證